


## "فصل المقال ف ما بين العلم أو الدِّرَّة من الانفصال"

الحسن الحافي


### 1- مقدمة

ما كانش اليوم شي واحد من بين "القاريين" ف المجتمعات العربية اللي ما يفهمش بأن كلمة "علم" كتعني كل ما توصل ليه الإنسان من معرفة أو معتقدات بدون تمييز، كان مصدرها مذهب ف الدين ولا مختبر ف الطبيعيات، حتى ولّى من المسلّم به أن الشي اللي كيتوصل ليه رجل الدين من استنتاجات ما كَتَقْلُش ف مستوى الحقيقة اعلى الشي اللي يكتشفو باحث ف مختبر اديال الميكروبيولوجيا ولا الكوسمولوجيا ولا الرياضيات ولا الكيمياء ولا الاقتصاد.... ولكن يقينية اكثر. فاستنتاجات رجل الدين ف أي مجال كتعتبر الحقيقة اللي ما تعلّى اعليها حقيقة حتى أنه انتصر تيار تجميد الفكر أو الابتكار تحت مبرر "النقل اقبل العقل". هاذ التخلّط جاي من كون الناس اترسخ ف الراس اديالها أن بجوجهم كيما رسوا "العلم" او هاذ المسألة ما عمر تم المراجعة اديالها فكريا ولا دينيا حتى اليوم باش الناس تقدر اتفرق بين هاذ جوج اديال الطرّقان اديال المعرفة. السبب اديال هاذ التخلّط هما تحريفيين شو هوا مفهوم قرآني لأغراض كهنوتية او رسخوه ف الوعي اديال العامة او افترض ف التالي اعلى الجميع بما فيهم الناس اللي اشتاغلوا اعلى الطبيعية او كل المفكرين او الفلاسفة اللي كانوا تحت سلطة الكهنوت او المدونين ف عصر قوة المسلمين او ازدهار الدولة اديالهم. الهدف الكهنوتي اديالهم من هاذ التحريف هو الاستهانة بكل عمل معرفي -أو بالخصوص الفلسفة- ما يدخلش ف الاختصاص اديالهم، فقسموا على هاذ الأساس العلم لعلوم شرعية أو لعلوم دنيوية، هاذ التالية ايخصها انكون تحت المراقبة اديالهم، أو إلى ما فهموهاش أو خرجت اعلى السيطرة اديالهم كيحاربوها أو ايوجهوا اقسى الإهانات او التهم لاصحابها ابحال الشي اللي وقع لعباس بن فرناس، جابر ابن حيان او ابن رشد أو غيرهم. هاذ الهيمنة ما زال مستمرة حتى اليوم، الشي اللي ف نظري، من الأسباب اللي فشلت أي إصلاح أو تطور عند العرب ف اتجاه بناء مجتمع معاصر كيساهم إيجابيا ف التطور اللي كتعرفو البشرية اليوم. اشحال من مرة كنت نحضر لمحاضرات اديال بعض الموراوجين لهاذ الخلط حول الموضوع أو كانوا كلهم بدون استثناء ييداوا برأي أو ايكملوا بالنقيض اديالو. بيدى المحاضر بآيات قرآنية ولا أحاديث نبوية ايحاول من خلالها ايوضح بأن الإسلام كيشجع اعلى "العلم الدنيوي" أو ف الأخير يوضع حدود أو شروط كتبين أنه ما فاهمش اشنو هو "العلم" اللي راه كيتكلم اعليه. كانوا كلهم كيلخصوا هاذ الفكرة ف الشكل اللي منبعد



ماشي مقبول

مقابل



مقبول

بمعنى إلى كان العلم ف دويرة الإسلام فهو مقبول، أما إلى كان برّا عليها فهو مرفوض. بطبيعة الحال هاذ الاستنتاج ما عندو معنى إلى رجّعنا العلم للنطاق اديالو اللي جا به الإسلام، اعلقاش العلم ف هاذ الحالة غادي ايبان بشكل طبيعي داخل دويرة الإسلام، بل هو "محكمات الإسلام" بنفسها، أو ما عندو معنى خارج هاذ الدويرة، أو كيصبح هاذ التقسيم فاقد للقيمة اديالو أو ما عندو حتى إضافة، انما كيصبح خطير ملى يتمدد هاذ المفهوم أو اولي يشمل كل النشاط الفكري أو المعرفي اديال الإنسان. فكنعتقد باش نتجاوزوا هاذ الخطر اقبل ما افوت الفوت، ايخصنا انميزوا ما بين هاذ المجالات. ايخصنا إوا انفكروا اشنو هو العلم أو اشنو غادي انسميو النشاط الفكري أو المعرفي اللي كيبحث ف حقيقة الطبيعة أو فهمها أو ف التّالي استغلالها لصالحو، نشاط اللي الزم الإنسان ملى اتوجد فوق هاذ المرض أو وصل الإنسانية للشّي وصلت إليه حتى اليوم أو اللي كذلك هو أساس كل حضارة ف كل امكان أو ف كل ازمان، هاذ هو الموضوع اللي غادي اناقش ف هاذ المقال اللي اعطيتو عنوان "فصل المقال ف ما بين العلم أو الدرية من انفصال" تكريما لروح الإمام الأعظم أو الفيلسوف أبو الوليد ابن رشد اللي كان اول مسلم حاول يفكر ف هاذ القضية ف اكتابو اللي أعطاه عنوان " فصل المقال فيما بين الحكمة و الشريعة من الاتصال".

## 2- العلم

واش كلمة "علم" أو "علوم" كيف ما هي مستعملة عند العرب حتى اليوم راها ف محلها؟ فإلى ارجعنا للقرآن الكريم وانشوفو المعنى اديال هاذ المصطلح، غادي نلقوا أن مفهوم العلم عندو المجال اديالو أو مايتحملش أكثر من الشّي اللي كيمثلو ف الآيات اللي اتناولتوا. من خلال هاذ الفصل غادي انحاول انحدد هذا المجال أو انبين التحريف اللي عرفو أو نكشف تيار التحريف اللي مراه أو التجذر اديالو ف المجتمعات المسلمة.

### 1. العلم اديال الله:

كيبين القرآن الكريم ، كما كتوضح الآيات اللي ف **الجدول 1** ، بأن العلم عند الله بوحده أو أنه يمكن ليه سبحانهو إخلي العباد اديالو، كانوا بشر ولا ملايكة ولا شياطين، احيطوا بجزء من هاذ العلم، أو اللي كيحتاجوه، أو كيبقى هذا الجزء مهما اكون أقليل بزاف. فيمكن لينا اها انقسموا علم الله لجوج "تحت أنطابق" (sous domaines):

أ- اللول علم مايمكنش يستوعبوه العباد لأنه ماشي مرتبط بالوقت ولا بالفضا أو ما يترتب اعليهم من الوجود، وهذا كنسميه **علم الغيب المرفوع** أو أنطابقو كتغير اعلی احساب العباد، فمثلا النطاق اديالو عند الملايكة ماشي هو نفس النطاق عند الإنسان. هاذ التحت انطاق يمكن بدورو يتقسم لجوج انواع:

- النوع اللول مايمكنش انفكروا فيه أو انبلوروا تساؤلات اعليه، اعلقاش سبحانهو تعالى ماهيأناش ليه، أو إوا ماكنحتاجوهش.

- النوع الثاني كيوصلو التفكير اديالنا بالتمديد أو يمكن إبلور تساؤلات اعليه ولكن مايمكنش اتبلور اعليه اجوابات قاطعة أو متناغمة مع أسس نفس التفكير اللي انتج السؤال، فيقدر اكون بسبب هاذ التمديد السؤال المحطوط ابراسو مغلوط. هاذ النوع من العلم هو

اللي شكل موضوع جدل بين الفرق الكلامية ف الإسلام او ف الديانات الاخرين اعلى الذات والصفات اديال الله أو غيرها، أو كل التساؤلات اديال الفلاسفة من اقديم الزمان حتى اليوم اعلى الوجود او كل ما مَرْتَابَط به من صفات، أو اعلى العالم أو غيرهم، أو من بينها السؤال العظيم اللي متعلق بوجود الله نفسو أو مايترتب اعليه من قضيات موضوع الجدل بين المومنين او غير المومنين.

هاذ العلم "المرفوع" هو اللي اُنْكَلَمْت اعليه الآيات من سورة "عبس" : "كلا إنها تذكرة (11) فمن شاء ذكره (12) في صحف مكرمة (13) مرفوعة مطهرة (14) بأيدي سفرة (15) كرام بررة (16)"

فَمَنْ خلال هاذ الآيات كنْفهموا بأن علم الله موجود ف صحف مرفوعة كاملة حرة مافيه نقصان ولا اشوايب، أو هذا هو معنى "مطهرة"، أو منها يمكن إلى ابْغى سبحانو يَعْلَم العباد اديالو بجزء منو اعلى يَدِين السفرة اديالو اللي يمكن ايكونو الملايكة ولا غيرهم من العباد اديالو كما ذكروا بعض المفسرين القدامى.

ب- الجاوج هو علم الله المعروف وهو الشئ اللي اوصلنا اعلى اطريق الرسل أو الأنبياء أو حتى أولياء الله الصالحين، أو حتى هو يمكن انقسموه لجوج اصنوفاً:

- اللول ما يقبل غي التسليم، أو اعلى راسو التسليم بالله كَمَا هو مذكور ف القرآن، أو الإيمان كذلك بالملايكة أو الجن أو غيرهم من عباد الله كما هي مذكورة كذلك ف هاذ العلم، كذلك بالبعث أو الآخرة أو الحساب اللي كينتظر المومن بعد الموت أو الخلود يا إما ف النعيم ولا ف العذاب أو زيد أو زيد. كنقصد اهنا بالتسليم ماشي القبول الحرفي للتصويرة ولكن للفكرة اعلحقاش الفكرة واسعة او حدودها ما معروفاش عكس التصويرة اللي مساحتها باينة او حدودها مضبوطة.

- أما الجاوج، فهو صنف ابحال اللول، التسليم به أو لأبَدً ، ولكن ادماغ الإنسان يمكن يتصور احقايق اتزيد اترسخ الإيمان اديالو اشحال ما زادت اتطورت المعرفة اللي عندو أو امشى بها ابعيد. كمثل اعلى هاذ الشئ بداية أو نهاية العالم اللي كيتربط في الديانات السماوية بالخلق أو نهاية العالم، اللي هما علم جزء منو معروض اعلينا من الله سبحانو تعالى ف صيغة ما كتجاوزش تحمل الدماغ اديال الناس اللي عاصروا نزول هاذ الرسالات. فمثلا ف القرآن الكريم كاين علم اعلى البداية؛ بداية خلق السموات والارض "هو الذي خلق السموات والأرض في ستة أيام ثم استوى على العرش" سورة الحديد (4)، " وإذ قال ربك للملائكة إني جاعل في الأرض خليفة" سورة البقرة (30)، " خلق الانسان من صلصال كالفخار وخلق الجان من مارج من نار" سورة الرحمن (14-15)، أو كاين علم اعلى النهاية كذلك؛ "يوم يطوي السماء كطي السجل للكتب، كما بدأنا أول خلق نعيده" سورة الأنبياء (104)، "كل من عليها فان ويبقى وجه ربك ذو الجلال والإكرام" سورة الرحمن (26-27)، "إذا زلزلت الأرض زلزالها" سورة الزلزلة (1)، "القارعة، ما القارعة، وما أدراك ما القارعة، يوم يكون الناس كالفرش المبثوث، يوم تكون الجبال كالعهن المنفوش" سورة القارعة (1-5)، أو غيرهم من الآيات الكثيرة، ولكن ايخص اهنا الواحد يفهم أن العلم المعروف هو حتمية النهاية كفكرة، ماشي تصويرة لكيفاش غادي اتكون اعليها النهاية، أو اللي ما يمكنش يكشف اعليها سبحانو أو تعالى حيث المخ اديال الانسان ما يتحملهاش، أو لهاذ السبب خلّى الله سبحانو للإنسان هو يبحث أو

ايطور التصويرة اللي يتقبلها الجهاز اديال التفكير اديالو حسب المعرفة اللي اتوصل ليها، أو لهاذ السبب يمكن اتولي التصويرة اللي مطروحة ف النصوص المقدسة فايتهال الوقت ملي يوقع تطور اكبير ف المعرفة. هاذ الشي بطبيعة الحال، ما اينقصش من قيمة الدين ولا يطعن فيه كما كيروجوا رجال الدين المتزمتين أو لهاذ السبب جات ف الإسلام الآية الكريمة " قل سيروا في الأرض فانظروا كيف بدأ الخلق" سورة العنكبوت (20). فاليوم، ف الوقت اديالنا، يمكن البال ابتناغوم امع المعرفة المعاصرة يبني نظرية معرفية اعلى بداية أو نهاية العالم، كما هو الحال ف نظرية الانفجار العظيم ف "علم" الكسملوجيا، اللي ولي الإنسان من خلال هاذ النظرية المبنية اعلى الرياضيات أو الملاحظات أو التجارب اللي قام بها انطلاقا من الإمكانيات التكنولوجية اللي كيتوفر اعليها اليوم، يعرف بأن الكون (l'univers) راه كيتمدد أو غادي يوصل واحد الحالة اللي منبعدها يمكن غادي يبدأ يتكمش حتى مايقاش. هاذ النظرية كتحكي بداية العالم أو كتوقع نهايتو، ولكن هاذ التوقع ماشي حقيقة ثابتة ولا نهائية، فيمكن ف المستقبل ايتم التخلي اعليها لصالح نظرية اجديدة تاخذ بعين الاعتبار ملاحظات اجديدة كتخرج اعلى الإطار الحالي اللي غادي ابولي ما كيستوعبهاش. بطبيعة الحال هاذ الجوج اديال الصنوقا من العلم المعروض مداخلين بيناتهم او متكاملين ايخص يمتالكهم الواحد بجوج باش ايكون الإيمان اديالو متكامل. هاذ العلم "المعروض" هو اللي كتكلم اعليه الآية الكريمة 72 من سورة الأحزاب:

"إِنَّا عَرَضْنَا الْأَمَانَةَ عَلَى السَّمَاوَاتِ وَالْأَرْضِ وَالْجِبَالِ فَأَبَيْنَ أَنْ يَحْمِلْنَهَا وَأَشْفَقْنَ مِنْهَا وَحَمَلَهَا الْإِنْسَانُ إِنَّهُ كَانَ ظَلُومًا جَهُولًا"،

ف هاذ الآية كنعقد بأن كلمة "الأمانة" كتعني العلم المعروض، هاذ المعنى كان حتى عند بعض المفسرين لقدام، فيهم اللي قال هي العقل، بصح ماشي العقل اللي غادي نتكلم اعليه اهنا، حتى الإمام الغزالي قال بأنه يعني المعرفة.

## 2. العلم المعروض كيبلغوه الرسل والأنبياء او الوُلياء

إلى اتصفحن القرآن الكريم كيتبين لينا بأن العلم المعروض كيتبلغ للناس اعلى اطريق الأديان؛ الله سبحانه كينزل هاذ العلم اعلى الأنبياء أو الرسل او الأولياء الصالحين اللي كينشروه بين القوم اديالهم أو للناس اجميع كما كيبان ف عديد من الآيات اديال القرآن الكريم، اللي كذلك كتوضح أن هاذ العلم هبة من الله ولكن ابلا تفصيل كيفاش:

ت	الآية	السورة	العبد المقصود
1	يَا أَبَتِ إِنِّي قَدْ جَاءَنِي مِنَ الْعِلْمِ مَا لَمْ يَأْتِكَ	43 مريم	ابراهيم
2	وَأَنَّهُ لَدُوْ عِلْمٍ لِّمَا عَلَّمْنَاهُ	68 يوسف	يعقوب
3	وَلَمَّا بَلَغَ أَشُدَّهُ آتَيْنَاهُ حُكْمًا وَعِلْمًا	22 يوسف	يوسف
4	وَلَمَّا بَلَغَ أَشُدَّهُ وَاسْتَوَى آتَيْنَاهُ حُكْمًا وَعِلْمًا	14 القصص	موسى
5	قَالَ إِنَّ اللَّهَ اصْطَفَاهُ عَلَيْكُمْ وَرَادَهُ بَسْطُهُ فِي الْعِلْمِ وَالْجِسْمِ	247 البقرة	طالوت
6	وَلَقَدْ آتَيْنَا دَاوُودَ وَسُلَيْمَانَ عِلْمًا	15 النمل	داود أو سليمان
7	فَفَهَّمْنَاهَا سُلَيْمَانَ وَكُلًّا آتَيْنَا حُكْمًا وَعِلْمًا	79 الأنبياء	سليمان
8	وَإِذْ عَلَّمْنَاكَ الْكِتَابَ وَالْحِكْمَةَ وَالتَّوْرَةَ وَالْإِنْجِيلَ	110 المائدة	عيسى

9	وَلَئِنْ أَتَبَعْتَ أَهْوَاءَهُمْ بَعْدَ الَّذِي جَاءَكَ مِنَ الْعِلْمِ مَا لَكَ مِنَ اللَّهِ مِنْ وَلِيٍّ وَلَا نَصِيرٍ	120 البقرة	محمد
10	وَأَنْزَلَ اللَّهُ عَلَيْكَ الْكِتَابَ وَالْحِكْمَةَ وَعَلَّمَكَ مَا لَمْ تَكُنْ تَعْلَمُ	113 النساء	محمد
11	أَتَيْنَاهُ رَحْمَةً مِنْ عِنْدِنَا وَعَلَّمْنَاهُ مِنْ لَدُنَّا عِلْمًا	65 الكهف	عبد من عباد الله

الجدول 1 : آيات تؤكد ان العلم كينزل اعلى الرسل أو الولا

فبالإضافة للانبياء أو الرسل كنلاحظوا أن ف الآية التالية (11) من الجدول 1 أن الشخص المعني بالعلم ماشي انبي ولا رسول، انما هو ولي من أولياء الله الصالحين، الشئ اللي اياكلنا نستنتجوا بأن الله سبحانه ما كيقطعش الاتصال اديالو بالإنسان، وحي اعطى العلم ف القرآن بأنه ما غاديش يرسل شي رسول من بعد محمد (ص) اللي هو خاتم الانبياء او الرسل. هاذ القضية اتكلموا اعليها بزاف اديال رجال الدين او منهم حجة الإسلام أبو حامد الغزالي ف الكتاب اديالو "علوم احياء الدين" (1) او سماه علم المكاشفة حيث ايكول :

"و هو علم الصديقين و المقربين، اعني علم المكاشفة فهو عبارة عن نور يظهر في القلب عند تطهيره و تزكياته من صفاته المذمومة، و ينكشف من ذلك النور أمور كثيرة كان يسمع من قبل أسماءها فيتوهم لها معاني مجملة غير متضحة، فتتضح إذ ذاك حتى تحصل المعرفة الحقيقية بذات الله سبحانه، و بصفاته الباقيات التامات، و بافعاله، و بحكمه في خلق الدنيا و الآخرة...ومعنى لفظ الملائكة و الشيطان،... ومعنى حصول السعادة بمرافقة الملائكة و مقارنة الملائكة والنبيين" حتى ايكول :

"فنعني بعلم المكاشفة أن يرتفع الغطاء حتى تتضح له جليلة الحق في هذه الأمور اتضاحا يجري مجرى العيان الذي لا يشك فيه، وهذا ممكن في جوهر الإنسان لولا أن مرآة القلب قد تراكم صدوها و خبثها بقاذورات الدنيا"  
غادي نرجع لهاد الصنف اديال أصحاب العلم منبع ما نوضح الغاية العظيمة من العلم المعروف ف الفصل اللي منبع.

### 3. الغاية العظيمة من العلم المعروف

إلى ارجعنا للآية 72 اللي ف سورة الأحزاب (الصفحة 4)، غادي ايجي للذهن اديالنا السؤال علاش الله سبحانه اتكلم اعلى الأمانة أو ما استعملش مصطلح ايمكنا نفهموا اشنو هي هاذ الأمانة، أو اشنو هو المقصود ب "عَرَضَ"؟ كنعرفوا كَمَا ف جميع القواميس اديال اللسان العربي أن اللّمانة هي شي حاجة عندها قيمة اكبيرة كتربط جوج اديال الأطراف، طَرَف اللي هو مول هاذ اللّمانة ولكن لظروف كتعنيه ما قادرش ايحافظ اعليها بوحدو، أو طرف جوج كيشد هاذ اللّمانة عندو أو ايحافظ اعليها حتى يسترجعها الطرف اللول اللي هو مولها. اللول كيتسمى مستامين والثاني مستامان، أو إلى ما رَجَعَش المستامان اللّمانة لصاحبها مَلِي يطلبها منو، لشي سبب كيف ما كان ، ابحال التضايح ولا التصرف فيها بغير حق، ايكول هاذ التالي خان اللّمانة أو يتسمى خاين بدل أمين إلى كان حافظ اعليها. هاذ اللّمانة حيرت المفسرين القدام أو اجداد، أو كل واحد واش غال، ها اللي غال هي الطاعة لله، أو ها اللي غال الفرائض، أو ها

(1) إحياء علوم الدين، أبو حامد الغزالي، تحقيق سيد إبراهيم، دار الحديث القاهرة، طبعة 2004

اللي غال الاختيار، أو كاين اللي اربطها بقصة آدم مع اولادو (2)،... كل هاذ التاويلات ماهياش "علم يقين"، ولكن غي اشكال من الظن، كما غادي نشرح مَنبَعِد. لهاد الشي يمكن تتحمل اتاويل متعددة ف نفس الوقت أو الزمان، أو يمكن لكل مومن ايرجح تاويل اعلى آخر حسب الإيمان أو المعرفة اللي عندو، أو كذلك يمكن تتطور هاذ التاويل أو ايكون لكل ازمان التاويل اللي يتلاءم مع المعرفة المَثَوَّرَة للناس اديالو. من هاذ القناعة يمكن انشوف لهاد الآية بالطريقة اللي منبَعِد.

### - طبيعة المستامن:

**السموات:** أشنو هو المعنى اديال هاذ الكلمة؟ المصطلح اديال اسما كان جزء من البنية اديال المنظومة الجيومركزية (géocentrique) اللي كانت الإطار النظري اللي ايفسر الكون من وقت الحضارة اليونانية اقرون اقبل المولد اديال المسيح أو اللي كان من أكبر المدافعين اعليها ارسطو أو بيَّنْها بشكل كامل بطليموس ف اكتابو "الماجسطي"، الفيلسوف اللي عاش ف الإسكندرية ف مصر ف القرن الجاوج بعد الميلاد ف عصر الحضارة اليونانية حتى اتسمات بالسمية اديالو "منظومة باطليموس" أو اقضات لمدة قرون اعلى النظريات الخرين. ف هاذ المنظومة السما هي حد عالي كيقابل للرض ابحال اسقف اديال شي دار كيقابل للرضية اديالها، أو كيقسم هاذ النظام السما لسبع افلاك (sphères) بلورية مستمركزة أو للرض هي المركز المشترك اديالها، كل فلك فيه واحد من الكواكب السبعة ابتداء من القمر ثم عطارد، الزهرة، الشمس، المشتري، ثم زحل، أو فوق منهم فلك النجوم الثابتة، هاذ النظام اتحول من معرفة انسانية مبنية اعلى الملاحظة أو الرياضيات اديال أقليدس، كتقبل النقاش أو الدحض أو التطور، لعقيدة مقدسة ف الاديان "السماوية" الشي اللي خلاه كما اذكرت ايدوم مدة 14 قرن. القرآن الكريم مثلا كيذكرها بالجمع أو حدد العدد اديالها ف سبعا سماوات ابحال الشي اللي كيذكرو النظام اديال بطليموس، كما جا ف الآيات :

"الذي خلق سبع سماوات طباقا ما ترى في خلق الرحمن من تفاوت فارجع البصر هل ترى من فطور" (الملك 3)، أو

"وهو الذي خلق الليل والنهار و الشمس والقمر، كل في فلك يسبحون" (الأنبياء 33). هاذ الشي كيدل على أن الله سبحانه ما يخاطب الإنسان إلا على احساب ما يفهمو أو يتحملو البال اديالو أو الشي اللي هو معروف بين الناس، اعلى هاذ الشي جا ف القرآن الكريم :

"لا يكلف الله نفسا إلا وسعها" البقرة 286

"إن الله لا يغير ما بقوم حتى يغيروا ما بأنفسهم" الرعد 11

اليوم مصطلح "السما" ما ابقاش يتسعمل ف دريات الكسمولوجيا ولا الهيئة(\*) (astronomie)

(2) تفسير اديال الطبري: <http://quran.ksu.edu.sa/tafseer/tabary/sura33-aya72.html>  
(\*) كيتسمى ف العربية الرسمية المعاصرة "علم الفلك" بينما ف وقت اللُوج اديال هاذ المعرفة عند المسلمين كان كيتسمى "علم الهيئة"، المصطلح اديال الهيئة هو القريب لمحتوى هاذ المعرفة، أوقع التبدال اديالو ل "فلك" اللي هو مصطلح هندسي مجرد كان المعنى اديالو بكري (la sphère)، ما عارفش فوقاش أوقع هاذ التغيير ولكن كترجح ايكون ابدى يتسعمل ف هاذ العصر اديالنا اديال الانحطاط مع بداية الاطلاع اعلى دريات الغرب الحديثة أو ظهور ما يسمى الإعجاز العلمي، هاذ الزياعة غادي انفصلها ف قضايا اخرين مشابهة لهذي، وإا غادي نستعمل اهنا المصطلح اديال الجدود اللي بدعوا ف هاذ المجال أو انرجع لمصطلح الفلك المعنى الأصيل اديالو.

ولا الهيفيزيا(\*\*) (astrophysique) أو إنما اتعوض بمصطلح "الفضا"، أو اصبح المحيط المباشر اديال اللرض كيتسمى الغلاف الجوي أو بعدو الفضاء البراني. ولكن هاذ الشي ما كيغنيش أن هاذ المفهوم كيحبر اعلى حقبة امشات ايخص يمشي امعها، اليوم مازال صالح أو أي انسان محتاج يستعملو ف احياتو اليومية انطلاقا من الإحساس الفطري اديالو اللي ما عمر غادي يتغير، اللي هو أن السما تبقى هي اللي فوق راسو او اللرض هي اللي تحت رجليه، كما قال الشيخ بن تيمية ف الرسالة العرشية:

**"وأما بالنسبة إلينا فإن ما تحت أرجلنا تحت لنا و ما فوق رؤوسنا فوق لنا و ما ندليه من ناحية رؤوسنا إلى ناحية أرجلنا نتخيل أنه هابط"(3)،**

واخي يفهم أو يستوعب كل ما وصلتنا ليه التكنولوجيا من احقايق اعلى الكون، فكيبقى هاذ الشي اصحيح حتى ف المعرفة المعاصرة، ولكن ف اطار الشي اللي معروف بالتقريب المحلي (l'approximation locale). يمكن اليوم كذلك أي واحد إوا يعتمد اعلى هاذ الحقايق الدريوية أو ايعاود يشرح هاذ المفهوم باش يتناغم امع هاذ الحقايق، أو إوا يعتبر نفسو افهم القصد الإلهي منو، بينما ف الواقع أن هاذ المفهوم اديال السما كيبقى من علم الله المرفوع أو ما يمكن انصوغوا اعليه إلا معتقدات مبنية اعلى الظن.

**اللرض والجبال:** كيبان اهنا أو ف العديد من آيات اخرين أن الجبال ماشي جزء من اللرض إلى فهمناها بأن المقصود بها كوكب اللرض، ولكن عكس ما هو رايج اليوم، كنعتمد بأن الله سبحانه ما ايعيبرش الفطرة اديال الإنسان او المعرفة اللي كيكتاسبها او تصبغ هاذ الفطرة او كنتطور امعها، كما قال ابن تيمية ف الرسالة العرشية:

**"و أما من جهة الشريعة فإن الرسل صلوات الله عليهم بعثوا بتكميل الفطرة وتقريرها؛ لا بتبديل الفطرة"(3)**

فالمقصود اهنا إوا هي المساحة المنبسطة اللي كيحس بها كل واحد أو ايعيش فيها، أو بلغة الرياضيات كنعرفوا ف الهندسة التفاضلية اللي بانث ف عصر النهضة اديال أوروبا اعلى يد بيرنهارد ريمان ، نيكولا لوباتشيفسكي أو غيرهم، بأن كل افضا ارطب (espace lisse) يمكن التقريب اديالو محليا بفضا منبسط أو اتشوفو وفق هندسة اوقليدس اللي كانت اتشوف العالم ف شموليتو منبسط ف عصر اليونان. إوا، الجبال هي المرتفعات اللي كتشكل حواجز بين لرض أو لرض. ف إلى شفا اغلب الآيات اللي كتهدر اعلى الجبال كنلقاوا بأنها من ناحية كتشكل مصدر إلهام أو تحدي ابحال: **"لن تبلغ الجبال طولا"** أو من ناحية اخرى ابحال إلى عندها شي دور اعظيم كتلعبو ف هاذ العالم ولكن نبه ليه القرآن الكريم من باب الشي اللي يقدر يقبلو البال ف ذاك الوقت اللي نزل فيه الوحي أو اللي هو أن اللرض منبسطة أو الجبال "رواسي" أو "أوتاد" فيها باش ما ائميلش ل شي جهة، اللي هما بهاذ الإدراك خلاصة معرفة كانت متداولة ف الحضارات اللي ف حقبتها جا الإسلام أو كيبقى بطبيعة الحال العلم اليقين من علم الله المرفوع.

(\*\*) نفس الملاحظة: الترجمة اللي كتستعمل هي "الفيزياء الفلكية"، الهدف اديالي هو انتاج مصطلح علمي ادقيق بدل التعابير الأدبية اللي كتتميز بيها العربية اديال المدرسة ف انتاج المصطلح ف مجال اديال الدريات، حيث كاين غياب شبه تام اديال آلة انتاج المصطلح الدريوي ف هاذ اللغة حتى اليوم

(3) شوف "عرش الرحمن وما ورد فيه من الآيات و الأحاديث" لبن تيمية، ص 39 أو 42:

<http://www.al-tawhed.net/Books/Show.aspx?ID=877>

اليوم بطبيعة الحال هاذ الصورة ما كيقبلهاش البال، لأن اللرض فلكية الشكل (\*) اوالقطر اديالها اجوايه 6400 كيلومتر تقريبا، أما السلاسل الجبلية فما كيتعداش العلو اديالها 10 كلم، أو تشكلت حسب النموذج الجيولوجي، المقبول اليوم اكثر من أي واحد آخر، نتيجة تصادم الصفايح التكتونية بيناتها، أو ما يمكنش إوا اتفهم اعلى أنها كتساهم ف توازن اللرض. إوا الشي اللي يمكن المومن الحقيقي ايحطو ف قلبو هو أن للجبال دور اعظيم، بحيث يمكن لينا نفهموا، اعلى طريق ما اوهنا الله من بال، بعض لجباب اديال هاذ الدور، ابحال دورها ف المناخ ف التنوع البيئي أو يمكن انطلاق من هاذ التصاور نصوغوا ظنيات، أما العلم اليقين فهو عند الله سبحانهو ، ولكن ماشي التصويرة اللي كيحاولوا أصحاب "الإعجاز العلمي" ايرجوا، أو يعطيو معلومات مغلوطه اعلى ما اتوصلت ليه المعرفة اليوم أو إوا يستغفلوا الناس، باش ايكُلوا ليهم راه المعرفة اديال اليوم كُتأكد ما جا به الإسلام هاذي 14 قرن، أو هما كيظنوا بأنهم كيخدموا الإسلام بهاذ الطريقة بينما هما ف الحقيقة كيسيئوا الظن بالله بلا ما يشعروا.

**الإنسان:** وُحدين منو اللي اكتب هاذ الرأي أو اللي يقراه أو اللي احاجي أو افك بوحدهو كما كيگولوا المغاربة. الإنسان كيعتبر راسو المركز في العالم حتى يثبت العكس، واخى راه يتگال اليوم يمكن اتكون حياة ذكية موجودة ف كواكب كتشبه اللرض، أو إوا ايصو يعرف الحقيقة اللي جابتهو للوجود، أو ايصو يفهم آش كيجمعو امع السماوات أو امع اللرض أو الجبال أو أشنو كيغرفو اعليهم؟ ولكن باش يتحاط بهاذ التساؤلات ما خصش فقرة ولا كتاب ولا حتى اختصاص فكري وإنما اخص يتستوعب كل النشاط الفكري اديال الإنسانية ملّي بدا ايفكر الإنسان حتى اليوم، أما باش يوصل لجوابات نهائية فهو ضرب من الخيال، أو حتى القرآن الكريم أتكم اعلى هاذ القضية او اعترف بأنها ماشي ممكنة كما جا ف الآية الكريمة: **"قل لو كان البحر مدادا لكلمات ربي لنفد البحر قبل أن تنفذ كلمات ربي ولو جئنا بمثله مددا(109) قل إنما أنا بشر مثلكم يوحى إلي أنما إليهم إله واحد فمن كان يرجو لقاء ربه فليعمل عملا صالحا ولا يشرك بعبادة ربه أحد(110)" سورة الكهف،** الشي اللي كيغني أن علم الله اللي عبر اعليه ب "كلمات" ما يمكنش يستوعبو الإنسان، لهذا كما جا ف الآية المهم هو غاية الانسان، فإلى كان لقاء الله ف هاذ الأمر كيتحقق بالعمل الصالح أو عدم الإشراف به ف العبادة، أو هاذو هما جوج اديال الساريات اللي كيوقف عليهم الإسلام.

**الأمانة:** كما قلت من قبل الأمانة كتخص جوج اديال الأطراف، أو إلى كان طرف ثالث شاهد اعلى تسلم الأمانة، ف هاذ الحالة ما كتبقاتش أمانة ولكن كتولي مسؤولية عادية كتخضع لمحاسبة جوج ضد واحد، يعني محاسبة الأغلبية، والأمانة ايصو اللي ايشدها ما يعرفش ف الأصل المحتوى اديالها أو إلى اوصل شاف هاذ المحتوى غادي ايكون خان الأمانة.

(\*) استعملت مصطلح "فلكية الشكل" بدل المصطلح الرايج اللي هو "كروية الشكل" حيث كنعقاد ان مصطلح "كرة" ماشي ف محلو او أنه ربما ايكون تم التحريف اديال المعنى اديالو ف العصر اديالنا عكس المعنى اللي كان عندو ف الماضي، هاذ المسألة غادي انحاول نتحقق منها ف مناسبة اخرى.



ف هاذ الآية جات كلمة "الأمانة" معرفة ب "ال" ابحال إلى قال شي واحد راني عرضت "المسؤولية" اعلی افلان أو افلان أو افلان...، فيمكن نفهموا ف جوج اديال الاتجاهات. الاتجاه اللول هو أن نفس "المسؤولية" اتعرضت اعلی هاذ الأشخاص كلهم، أو الاتجاه الثاني هو أن كل شخص اتعرضت اعلیه مسؤولية مَحْتَأَلَفَة. باش نحسموا آش من اتجاه اصحيح ايخص نعرفوا هاذ الشخص اللي اعرض هاذ المسؤولية أو يعطينا التفاصيل اعلیها، ولا بالتقابل نقوموا بنفس المهمة عند الأشخاص اللي اتعرضت اعلیهم المسؤولية واحد واحد أو انقارنو المعلومات اللي اعطاوننا. ولكن إلى طبقنا هاذ نفس الطريقة اعلی "الأمانة" فما يمكنش نوصلوا لشي حل، اعلحقاش، من ناحية صاحب اللمانة ما يمكنش يكشف اعلی محتوی اللمانة، اعلحقاش هاذي هي الإرادة الأصلية اديالو، أو من ناحية أخرى اللي شدوها كذلك ما يقدروش يعرفوا واش عندهم نفس اللمانة ولا لا، فالی حاولوا يعرفوا ايكونوا خانوا الأمانة. إوا احنا ف وضعية كينعدم فيها اليقين أو كيسود فيها الظن، لهاذا ما يمكن هنا إلا انصوغوا ظنيات(\*) ابحال:

**ظنية اللمانة:** المحتوی اديال اللمانة اللي اتعرضت اعلی الإنسان يمكن ايكون مَحْتَأَلَف على المحتوی اديال اللمانة الي اتعرضت اعلی السماوات ولا اللرض ولا الجبال. الشي اللي ايغلب هاذ الظن هو أن هاذ الاجناب مختلفة من حيث الطبيعة اديالها أو من حيث الدور اديالها ف هاذ الكون أو الاستقرار اديالو، فما يمكن غي ايكون كل جنب أو أمانتو (4). ف ما ايخص الإنسان، فاللمانة اللي اتعرضت اعلیه الظاهر اديالها ولا الغلاف اديالها هو العلم المعروف أو الباطن اديالها هو علم مرفوع ما غادي يعرفو الإنسان إلا انهيار ايرجع اللمانة لمولاهها، فكل ما ايقوم به اليوم الإنسان من محاولات يدّعي فيها أنه راه اوصل يعرف هاذ الحقيقة ولا هاذ السر اعلی الله سبحانه ما هي إلا محاولات فاشلة لخيانة هاذ الأمانة، أو تبقى اللمانات الخرين اللي اتعرضوا اعلی الظروفا الخرين كذلك من العلم المرفوع. هاذ العلم المعروف اللي متحد امع العلم المرفوع ، ابحال اسطح اللي كيجد حفرة كحلة، هو أساس الإيمان كما جا ف الحديث " لا إيمان لمن لا أمانة له" (5).

قلت من قبل بأن اللي كيعرض شي أمانة كيكون مضطر مشي مُخَيَّر، واش هاذ السبب كينطبق اعلی هاذ الحالة؟ باش انجاوبوا اعلی هاذ السؤال ايخص انشوفوا اعلاش الإنسان بوحدو احمل اللمانة امع وجود خطر الخيانة، اعلی حقاش كما جا ف آخر الآية "لأنه كان ظلوما جهولا": فالظلم هو ظلم النفس اللي خرَّج آدم من الجنة كما جا ف الآية:

**"قالا ربنا ظلمنا أنفسنا وإن لم تغفر لنا وترحمنا لنكونن من الخاسرين" الأعراف 23**

أما الجهل ف كيخلي الإنسان ايتيه، الشي اللي يمكن إيأدي به للتهلكة أو العقاب اديال الله سبحانه كما كيبان ف الآية من سورة الأنعام:

**"وَإِنْ كَانَ كَبُرَ عَلَيْكَ إِعْرَاضُهُمْ فَإِنْ اسْتَطَعْتَ أَنْ تَبْتَغِيَ نَفَقًا فِي الْأَرْضِ أَوْ سُلَّمًا فِي السَّمَاءِ فَتَأْتِيَهُمْ بِآيَةٍ وَلَوْ شَاءَ اللَّهُ لَجَمَعَهُمْ عَلَى الْهُدَى، فَلَا تَكُونَنَّ مِنَ الْجَاهِلِينَ" (35)**

(4) ف تفسير البغوي كاين هاذ الإشارة لكون نوع اللمانة مختلف بالنسبة لكل طرف، شوف

الموقع: <http://islamport.com/w/tfs/Web/41/2533.htm>

(\*) ظنيات جمع ظنية كنطلق هاذ المصطلح اعلی المعتقدات المبنية اعلی الظن

(5) <https://dorar.net/hadith/sharh/92129>

ف هاذ الاية كيحذر الله سبحانه الرسول محمد (ص) بأن محاولة اقناع الناس بالرسالة بالبحث اعلى الأدلة ف اللرض او السما هو من الجهل، الشي اللي كيغطي الدليل القاطع اعلى الجهل اديال أصحاب "الإعجاز العلمي".

وجود الإنسان بطبيعة الحال مرتبط بوجود اللرض أو السما أو الجبال اللي ما عندو منها لاين باش يحمي راسو او ايحافظ اعلى وجودو، هاذ الارتباط العضوي كيزيد من الجهل اديالو او كيغطي اعليه الحقيقة، أو لربما هاذ هو السبب اعلاش هاذ التوالا اعتذروا اعلى تحمل مسؤولية اللمانة باش ما يكونش عندهم تأثير اعلى الرغبة اديال الإنسان أو يبقاوا امحايدين ما يتحملوش مسؤولية الجهل اديالو، لهاذ السبب الله سبحانه اكتب اعلى راسو أنه يغفر ليه أو ايتوب اعليه إلي اطلب التوبة من بعد ما يخرج اعلى الطريق بسبب الجهل كما جا ف الآية:

"إِنَّمَا التَّوْبَةُ عَلَى اللَّهِ لِلَّذِينَ يَعْمَلُونَ السُّوءَ بِجَهَالَةٍ ثُمَّ يَتُوبُونَ مِنْ قَرِيبٍ فَأُولَئِكَ يَتُوبُ اللَّهُ عَلَيْهِمْ وَكَانَ اللَّهُ عَلِيمًا حَكِيمًا " النساء (17)

اللي يمكن نستنتجوه إوا، هو أن الاضطرار اهنا موجود، لكن الدافع ديالو ماشي هو الضعف ولكن هو الرحمة، أو الرحمة هي إرادة إلهية اكتبها هو اعلى نفسو لسبب يدخل ف العلم المرفوع، هاذ القضية هي اللي تشرح الآيات اللي منبعدا:

" رَبَّنَا وَسِعْتَ كُلَّ شَيْءٍ رَحْمَةً وَعِلْمًا " غافر (7)

"قَالَ عَذَابِي أُصِيبُ بِهِ مَنْ أَشَاءُ وَرَحْمَتِي وَسِعَتْ كُلَّ شَيْءٍ" الأعراف (106)

"كُتِبَ عَلَى نَفْسِهِ الرَّحْمَةُ لِيَجْمَعَ كُفْرُكُمْ إِلَى يَوْمِ الْقِيَامَةِ لَا رَبَّ فِيهِ" الأنعام (12)

"فعال لما يريد" البروج (16)

فالرحمة هي الأساس أو العذاب ما هو إلا استثناء، أو بما أن الرحمة مربوطة بالعلم أو الله سبحانه كايدير اللي ابغى، فهو سبحانه اعرض اعلىنا أمانة العلم باش نستافدوا من الرحمة اديالو أو نتجنبوا ظلم النفس اديالنا أو ما انطيحوش ف الجهل اللي ايادي للتهلكة اديالنا.

#### 4. امالين العلم من غير الرسل أو الأنبياء:

ف هاذ الفصل غادي انوضح قضية مهمة بزاف كتعلق برسالة العلم. قلت ف الفصل 3 اللي اسبق ان العلم كينزلو الله اعلى الرسل أو الأنبياء أو الوليا، أو كيكون هاذ التنزيل غالبا بطريقة الوحي كما هو بالنسبة للإسلام أو كيعطينا رسالة ولا كتاب ولا بشكل عام دين، أو كذلك يمكن ايكون بالمكاشفة بالنسبة للوليا الصالحين ف إطار ما يخرجش اعلى دين امعين كما اشرحت منقبل. فالآيات اللي ف الجدول 2 اللي منبعدا كتبين لينا أن الله سبحانه كيوجب العباد اديالو العلم اللي ايصصهم أو يحتاجوه القوم اديالهم. هاذ الفئة من العباد، اللي منهم الوليا الصالحين، كيتسموا ف القرآن الكريم " أولو العلم " أو "أوتوا العلم" "ذو علم" "عنده علم"، "الراسخون في العلم"، هاذ الشي ما يتعلقش فقط بالبشر ولكن كذلك بالملايكة أو بغيرهم من خلق الله. هاذ امالين العلم، الله سبحانه أوتعالى ما بينش كيفاش كيوصلهم هاذ العلم، طبعاً ما غاديش ايكون بالطريقة اديال الرسل أو الأنبياء وإلا غادي ايكونوا رسل أو انبياء حتى هما، أكيد جزء من العلم اديالهم اكتاسبوه من الكتب السماوية اللي بين يديهم بالتعمق ف التفكير فيها، ولكن جزء

آخر كيتوصلوا اليه مَلِي يَصْفِي القلب، كَمَا اتكلموا اعليه شيوخ الصوفية الكبار منهم حجة الإسلام أبو حامد الغزالي اللي سماه الإلهام أو المكاشفة (5) كما اذكرت منقبل:

ت	الآية	السورة	توضيح المقصود
1	وَالرَّاسِخُونَ فِي الْعِلْمِ يَقُولُونَ آمَنَّا بِهِ كُلٌّ مِنْ عِنْدِ رَبِّنَا	7 آل عمران	امالين العلم ف وقت مجيئ الإسلام
2	شَهِدَ اللَّهُ أَنَّهُ لَا إِلَهَ إِلَّا هُوَ وَالْمَلَائِكَةُ وَأُولُو الْعِلْمِ قَائِمًا بِالْقِسْطِ	18 آل عمران	امالين العلم فكل وقت
3	لَكِنَّ الرَّاسِخُونَ فِي الْعِلْمِ مِنْهُمْ وَالْمُؤْمِنُونَ يُؤْمِنُونَ بِمَا أُنْزِلَ إِلَيْكَ	162 النساء	امالين العلم من أهل الكتاب
4	قَالَ الَّذِينَ أُوتُوا الْعِلْمَ إِنَّ الْخِزْيَ الْيَوْمَ وَالسُّوءَ عَلَى الْكَافِرِينَ	27 النحل	امالين العلم ف الآخرة
5	إِنَّ الَّذِينَ أُوتُوا الْعِلْمَ مِنْ قَبْلِهِ إِذَا يُتْلَى عَلَيْهِمْ يَخِرُّونَ لِلْأَذْقَانِ سُجَّدًا	107 الإسراء	امالين العلم قبل نزول الوحي
6	وَأُوتِينَا الْعِلْمَ مِنْ قَبْلِهَا وَكُنَّا مُسْلِمِينَ	42 النمل	حرف الها ف "قبلها" لملكة سبأ اللي حتى هي من امالين العلم
7	وَقَالَ الَّذِينَ أُوتُوا الْعِلْمَ وَيَلَكُمْ ثَوَابُ اللَّهِ خَيْرٌ	80 القصص	امالين العلم ف عصر موسى
8	وَقَالَ الَّذِينَ أُوتُوا الْعِلْمَ وَالْإِيمَانَ لَقَدْ لَبِئْتُمْ فِي كِتَابِ اللَّهِ إِلَى يَوْمِ الْبَعْثِ	56 الروم	امالين العلم نهار البعث
9	وَيَرَى الَّذِينَ أُوتُوا الْعِلْمَ الَّذِي أُنْزِلَ إِلَيْكَ مِنْ رَبِّكَ هُوَ الْحَقُّ	6 سبأ	امالين العلم ف وقت الوحي
10	يَرْفَعُ اللَّهُ الَّذِينَ آمَنُوا مِنْكُمْ وَالَّذِينَ أُوتُوا الْعِلْمَ دَرَجَاتٍ	11 المجادلة	امالين العلم ف وقت الوحي
11	قَالُوا سُبْحَانَكَ لَا عِلْمَ لَنَا إِلَّا مَا عَلَّمْتَنَا إِنَّكَ أَنْتَ الْعَلِيمُ الْحَكِيمُ	32 البقرة	الملايكة حتى هما امالين علم
12	قَالَ الَّذِي عِنْدَهُ عِلْمٌ مِنَ الْكِتَابِ أَنَا آتِيكَ بِهِ	40 النمل	عبد من عباد الله ف وقت سيدنا سليمان ما معروفاش الطبيعة اديالو
13	هَلْ أَتَبِعَكَ عَلَى أَنْ تُعَلِّمَ مِمَّا عُلِّمْتَ رُشْدًا	66 الكهف	عبد من عباد الله ف وقت سيدنا موسى

## الجدول 2 : امالين العلم ف الدنيا أو الآخرة

هاذ الآيات كلها اللي ف الجدول (2) كتبتين، كَمَا لاحظت منقبل، أن الله اذكر هاذ العباد بأنهم "امالين العلم" أو مكايين حتى شي آية ف القرآن، ماعدا ف شي آيات اقليلة غادي نرجع ليها

(6) احياء علوم الدين اديال أبي حامد الغزالي؛ مرجع اذكرتو منقبل شوف (1)

منبعد، كيوصف فيها عباد ولا عبد من اعبادو أنهم "علماء" ولا "عالمون" ولا أنه "عليم".  
 هاذ الصفة إنما خصصها لراسو بوحده كَمَا غادي نشرح ف الفصل اللي منبعد، فهو اللي عالم  
 بالصفة او السمية، أما العباد اديالو فما يمكن ا يكونوا غي امالين علم، يعني عندهم جزء اقليل  
 من علم الله سبحانه أوصل ليهم ب إرادة اديال الله. لهاد الشي يمكن نستنتجوا بأن وصف إنسان  
 بأنه "عالم" هو تشباه بذات الله سبحانه أو تعالى. للأسف الانحراف اللي عرفو الإسلام الصحيح  
 خلّى هاذ الصفة شي حاجة عادية أو اتستعملت أو مازال لهدف مواجهة كل تجديد ف الدين أو  
 باش ا يتم نشر أو تكريس الفكر الواحد الشمولي اللي يسمح بالهيمنة أو الاستبداد. هنا يمكن  
 البعض غادي ايكول، فالى المصطلح مكانش ف القرآن فهو موجود ف الحديث النبوي  
 الشريف، بصح شي اشوية اديال التمعن ف مجموع هاذ الأحاديث اللي فيها هاذ المصطلح  
 غادي يكتشف أن جلها، إلى ما گلت كلها، يا إما إسنادها ضعيف، يا إما اغريبة، يا إما موضوعة  
 حسب المحققين (7)، الشي اللي كيطلب منا كمسلمين إعادة النظر في هاذ الجانب بالاعتماد  
 ا على الدريات المعاصرة باش نتأكدوا من الأحاديث المنسوبة للرسول (ص) واش اصححة  
 ولا املفة لغاية من غايات الهيمنة أو الاستبداد أو تكريس الطائفية ف الإسلام من طرف تيار  
 متجدر كيرسخ من ا زمان ابعيد ف التحريف اديال الإسلام. فالى كنا فعلا مسلمين حقيقين  
 كناؤمنوا بالقرآن أو السنة النبوية، ايخصنا انقوموا بهاذ الواجب باش انثبتوا السنة الصحيحة أو  
 انحايدوا كل ما ألصق بها من تحريف، ابلا ما اتكون هاذ التنتية كتبخس المجهود اللي قاموا  
 بيه ف الماضي الناس اللي جمعوا الحديث أو السنة، فمجهودهم هو نتاج الواقع اللي عاشو فيه  
 أو الاجتهاد اديالهم يبقّى بالنسبة لينا عندو القيمة التاريخية اديالو، ابلا ما نعتبروا الشي اللي  
 وصلوا ليه نهائي أو امقدس. فطريقة الإسناد أو العنونة مثلا ما كافيينش ف العصر اديالنا.  
 فيمكن ا يكون التعصب لطائفة أو تبرير سلطة مور افتراء حديث ولا حدث ولا سيرة، ولكن  
 ايخص استعمال الطرق الحديثة اللي كتوفرها المعرفة المعاصرة من اختصاصات معرفية اللي  
 كتهتم بظهور اللسون أو المفاهيم أو المصطلحات أو التطور اديالها ف الوقت.  
 إلى ارجعنا للآيات اللي اذكرت فيها كلمة "علماء" فهي جوج آيات ف القرآن كامل:

1	إِنَّمَا يَخْشَى اللَّهَ مِنْ عِبَادِهِ الْعُلَمَاءُ	28 فاطر
2	أَوَلَمْ يَكُنْ لَهُمْ آيَةٌ أَنْ يَعْلَمَهُ عُلَمَاءُ بَنِي إِسْرَائِيلَ	197 الشعراء

### الجدول 3

الآية اللولى اعلينا ابنوا ما يسمى "علماء المسلمين" العرش اديالهم، فكل المفسرين كيقتصدوا  
 بها راسهم أو زادوا ف اللائحة بعض المختصين ف "العلم الدنيوي" اللي كيستعملوا هاذ العلم  
 لخدمة الأهداف اديالهم واخى بالتلفيق أو التغفال، أما هاذوك اللي كيوليوا اينافسوهم أو احاولوا  
 ايرفعوا مستوى التفكير، فكبحاربوهم أو كينعتوهم بابشع النعوت، فما أنعت الغزالي (8) مثلا  
 بيه الفلاسفة ما هو إلا أطف ما اتغال:

“شردمة يسيرة من ذوي العقول المنكوسة والآراء المعكوسة... لا يعدون إلا من زمرة  
 الشياطين الأشرار”.

(7) تعاليق ف الحواشي اديال ابراهيم عزت المحقق اديال أجزاء "إحياء علوم الدين" اديال  
 الغزالي طبعة 2004 دار الحديث القاهرة

(8) تهافت الفلاسفة، ابوحامد الغزالي، تحقيق سليمان دنيا، دار المعارف مصر

حتى أن الكندي، رد على هاذ التعامل، أو سماهم "عدماء الدين" أو اعتبرهم ما هما إلا تجار ف الدين :

" فهم يعادون الفلسفة ذبا عن كراسيهم المزورة التي نصبوها عن غير استحقاق، بل للتروؤس والتجارة بالدين وهم عدماء الدين، لأن من اتجر بشيء باعه، ومن باع شيئا لم يكن له، فمن اتجر بالدين لم يكن له دين، ويحق أن يتعري من الدين من عاند قنية علم الأشياء بحقائقها، وسماها كفرا." (9)

ولكن الى دققنا ف الآية اللولى من الجدول (3) غادي انشوفوا أن الله سبحانه استعمل كلمة "عباده" قبل العلماء كان يمكن يتستغنى اعلى هاذ الكلمة أو اتجي الآية ابلا بها كما ف الآية الجاوجة، هاذ الزيادة ما عمّر أوقف عندها شي حد بالرغم من أن الوجود اديالها كيغير المدلول بشكل اعميق. فإلى ارجعنا للقرآن الكريم كنلقاوا بأن هاذ الكلمة ما يتّقصّدش بها فقط الإنسان أو إنما كذلك الملائكة أو غيرهم من خلق الله كما ف الجدول (4) اللي منبعده:

ت	الآية	السورة	المقصود بالعباد أو الخشية
1	وَقَالُوا اتَّخَذَ الرَّحْمَنُ وَلَدًا سُبْحَانَهُ بَلْ عِبَادٌ مُّكْرَمُونَ	(26 الأنبياء)	العبد ماشي امحدد اشكون
2	وَجَعَلُوا الْمَلَائِكَةَ الَّذِينَ هُمْ عِبَادُ الرَّحْمَنِ إِنِثَاءً	(19 الزخرف)	الملائكة اعباد الله
3	قُلْ كَفَىٰ بِاللّٰهِ شَهِيدًا بَيْنِي وَبَيْنَكُمْ وَمَنْ عِنْدَهُ عِلْمُ الْكِتَابِ	(43 الرعد)	مول علم الكتاب ماشي امحدد
4	قَالَ الَّذِي عِنْدَهُ عِلْمٌ مِّنَ الْكِتَابِ أَنَا آتِيكَ بِهِ	(40 النمل)	عبد ماشي امحدد ف عهد سيدنا سليمان
5	اللّٰهُ يَصْطَفِي مِنَ الْمَلَائِكَةِ رُسُلًا وَمِنَ النَّاسِ	(75 الحج)	الملائكة اعباد فيهم درجات
6	قُلْ لَوْ كَانَ فِي الْأَرْضِ مَلَائِكَةٌ يَمْشُونَ مُطْمَئِنِّينَ لَنَزَّلْنَا عَلَيْهِم مِّنَ السَّمَاءِ مَلَكًا رَسُولًا	(95 الإسراء)	الملائكة اعباد فيهم درجات
7	وَتَرَى الْمَلَائِكَةَ حَافِينَ مِنْ حَوْلِ الْعَرْشِ يُسَبِّحُونَ بِحَمْدِ رَبِّهِمْ	(75 الزمر)	التسبيح اديال الملائكة أو هما دايرين من كل جيه اعلى العرش هو الخشية
8	وَلِلّٰهِ يَسْجُدُ مَا فِي السَّمَاوَاتِ وَمَا فِي الْأَرْضِ مِنْ دَابَّةٍ وَالْمَلَائِكَةُ وَهُمْ لَا يَسْتَكْبِرُونَ	(49 النحل)	الدواب اعباد الله أو الخشية هي السجود بلا استكبار
9	وَيُسَبِّحُ الرَّعْدُ بِحَمْدِهِ وَالْمَلَائِكَةُ مِنْ خِيفَتِهِ	(13 الرعد)	الرعد عبد من اعباد الله امع الملائكة كايصبحوا كعلامة اديال الخشية
10	وَالْمَلَائِكَةُ يُسَبِّحُونَ بِحَمْدِ رَبِّهِمْ وَيَسْتَغْفِرُونَ لِمَنْ فِي الْأَرْضِ	(5 الشورى)	الملائكة كيسبحوا أو كيطلبوا المغفرة لاصحاب اللرض اعلا حقا كيعلموا بأن مكائش الخشية ف اللرض
11	وَإِنَّ مِنَ الْجَبَارَةِ لَمَّا يَتَفَجَّرُ مِنْهُ الْأَنْهَارُ وَإِنَّ مِنْهَا لَمَّا يَنْسَجُّ فَيُخْرَجُ مِنْهُ الْمَاءُ وَإِنَّ مِنْهَا لَمَّا يَنْهَضُ مِنْ خَشْيَةِ اللَّهِ وَمَا اللَّهُ بِغَافِلٍ عَمَّا تَعْمَلُونَ	(74 البقرة)	الحجر كيخشى الله فهو من عباد الله

الجدول 4: آيات كتبين اشكون يمكن ايكونا عباد الله.

(9) - الشرق الأوسط: <http://www.alawan.org/article9985.html>

<http://archive.aawsat.com/details.asp?section=19&article=634665&issueno=11940#.VbAyOfmJI8s>

هاذ الملائكة، ولأ اخلايق من خلق الله، فيهم كذلك اللي عندو علم من الكتاب أو فيهم الرسل أو خشيتهم لله كما اشرحت ف الجدول 4 ناتجة اعلى علم اليقين أو إوا ما فيها اطمع ولا تردد، لذلك كنظن أن المقصود من هاذ الآية هم صنف من الملائكة المقربين من الله سبحانه أو كمّا جاف الآيات 12 أو 13 من الجدول 4 اعباد كيرفعهم سبحانه لدرجة الملائكة ولكن ما يمكنش نعرفوهم.

أما الآية الجاوجة من الجدول (3) فكتخص بنو اسرائيل، أو كلمة "إسرائيل" اتذكرت ف القرآن الكريم 43 مرة، كذلك الأنبياء أو الرسل اديال بنو اسرائيل مذكورين بكثرة ف القرآن الكريم لدرجة أن موسى عليه السلام اتذكر 136 مرة (10)، أو إلي شفنا الآيات اللي من بعد:

"لَقَدْ نَجَّيْنَا بَنِي إِسْرَائِيلَ مِنَ الْعَذَابِ الْمُهِينِ مِنْ فِرْعَوْنَ إِنَّهُ كَانَ عَلِيًّا مِنَ الْمُسْرِفِينَ وَلَقَدْ أَخْتَرْنَاهُمْ عَلَى عِلْمٍ عَلَى الْعَالَمِينَ" الدخان: 30 - 32

"وَلَقَدْ آتَيْنَا بَنِي إِسْرَائِيلَ الْكِتَابَ وَالْحُكْمَ وَالنُّبُوَّةَ وَرَزَقْنَاهُمْ مِنَ الطَّيِّبَاتِ وَفَضَّلْنَاهُمْ عَلَى الْعَالَمِينَ وَآتَيْنَاهُمْ بَيِّنَاتٍ مِنَ الْأَمْرِ فَمَا اخْتَلَفُوا إِلَّا مِنْ بَعْدِ مَا جَاءَهُمُ الْعِلْمُ بَعِيًّا بَيْنَهُمْ إِنَّ رَبَّكَ يَقْضِي بَيْنَهُمْ يَوْمَ الْقِيَامَةِ فِيمَا كَانُوا فِيهِ يَخْتَلِفُونَ" الجاثية: 16، 17.

غادي نفهموا بأن إرادة الله سبحانه ابغات ايكونوا في مرحلة من مراحل تاريخهم مختارين أو امفضلين اعلى العالمين اعلى علم بحيث ايكون زاد لعباد منهم درجات ف العلم يمكن اتكون وصلت لدرجة الملائكة، أو إوا جات هاذ الصيغة ديال "علماء بني اسرائيل" أو هاذ الشي يمكن ايكون اوقع ف عهد سليمان عليه السلام، لأنه كمّا جا ف القرآن الكريم اعلى لسان سيدنا سليمان في سورة "ص" الآية 35:

"قال ربي اغفر لي وهب لي ملكا لا ينبغي لأحد من بعدي إنك انت الوهاب"

فكان ف هاذ الملك حاشية من اعباد الله العلماء اللي ماشي بالضرورة ايكونوا من البشر. ثم ف الأخير كلمة "علماء" ف عربية مضر هي جمع اديال عليم ماشي اديال عالم اللي غادي نشرح دبا. كاين آيات اللي جات فيها كلمة "عليم" أو جوج آيات فيها لفظة "عالمون" كما ف الجدول منبع:

ت	الآية	السورة	المقصود
1	قَالُوا لَا تَوْجَلْ إِنَّا نُبَشِّرُكَ بِغُلَامٍ عَلِيمٍ	(53 الحجر)	تبشير ابراهيم
2	قَالُوا لَا تَخَفْ وَبَشِّرُوهُ بِغُلَامٍ عَلِيمٍ	(28 الذاريات)	تبشير ابراهيم
3	قَالَ اجْعَلْنِي عَلَى خَزَائِنِ الْأَرْضِ إِنِّي حَفِيظٌ عَلِيمٌ	(55 يوسف)	يوسف
4	يَا تُوكَّ بِكُلِّ سَاحِرٍ عَلِيمٍ	(112 الأعراف)	السحرة
5	قَالَ الْمَلَأُ مِنْ قَوْمِ فِرْعَوْنَ إِنَّ هَذَا لَسَاحِرٌ عَلِيمٌ	(109 الأعراف)	موسى
6	وَقَالَ فِرْعَوْنُ أَتُنُونِي بِكُلِّ سَاحِرٍ عَلِيمٍ	(79 يونس)	السحرة
7	وَتِلْكَ الْأَمْثَالُ نَضْرِبُهَا لِلنَّاسِ وَمَا يَعْقِلُهَا إِلَّا الْعَالِمُونَ	(43 العنكبوت)	ما معروفش

## الجدول 5

من المعروف ف العربية بأن لفظة "عليم" كتستعمل كمصدر لفعل "علم"، فإذا كانت لفظة "عالم" جات ف القرآن الكريم مذكورة اثلطاش المرة أو دايمًا مربوطة بالغيب باش اتأكد ذاتية الله العالم، فلفظة "عليم" اتذكرت أكثر من اميا و خمسين مرة مربوطة بالإنسان باش اتأكد علم الله ابتصرفاتو كانت ظاهرة ولا مخفية، فالآية :

(10) مقال اديال حسام العيسوي "بنو اسرائيل ف القرآن" ف الموقع : <http://www.alukah.net/sharia/0/49368/#ixzz3Evp38Bjj>

"إِنَّ اللَّهَ عَالِمُ غَيْبِ السَّمَاوَاتِ وَالْأَرْضِ إِنَّهُ عَلِيمٌ بِذَاتِ الصُّدُورِ" (38فاطر)،

كتبيين هاذ المعنى. كذلك ف اللسان العربي كلمة اعلى وزن "فعليل" ابحال "عليم" هي صيغة مبالغة كتعني "كثير العلم"، أو المبالغة الهدف اديالها المقارنة أو لهاذ الشي نفهموا الآية الكريمة "وفوق كل ذي علم عليم" أو ما جاتش "وفوق كل ذي علم عالم"، فالإنسان ذو علم في حين الله هو العليم اللي ما فوقو عليم. لهاذ الشي فهو "العالم" بالمطلق ما كيحتاجش للمبالغة أو إوا للمقارنة امع حد، أو عليم بالنسبي بالمقارنة مع الإنسان اللي كرمو بالعقل أو البال. فإلى شفنا الآيات اللي ف الجدول (5) السابق كذلك، ف الآية 1 أو 2 متعلقين بتبشير سيدنا ابراهيم عليه السلام بولد ازيد عندو "عليم" اللي هو حسب القرآن الكريم ف آية اخرى إسحاق عليه السلام، أو باش نفهموا اعلاش هاذ الصفة اللي خصصو بها الله سبحانه اخص نربطوها بالكلمة اللي جات اقبلها اللي هي "غلام" أو اللي كتعني طفل، فكفاش يمكن ايكون طفل عليم؟

هاذ القصة القرآنية غادي نربطها، باش انجاوب اعلى هاذ السؤال، بموضوع فيه جدل اكبير هيمنت فيه أحكام اديال تيار التحريف، اللي هو اشكون كان غادي يذبح سيدنا إبراهيم؟ واش سيدنا اسماعيل ولا سيدنا إسحاق؟ ف بدل ما كان اخص ايكون التركيز اعلى قضية ذبح الإنسان أو كيفاش اتناولها القرآن الكريم، امشى التيار التحريفي ايزايد امع اهل الكتاب من مسيحيين أو يهود أو امع كذلك مسلمين من غير العرب، اللي هما الفرس، باش يثبت بأن اللي كان غادي يتذبح هو سيدنا اسماعيل جد العرب بدل إسحاق اللي هو جد اليهود او الفرس، وخی المسلمين اللوالى (11) كانوا فاهمين بأن المقصود بالذبيح هو سيدنا اسحاق ماشي سيدنا إسماعيل. هاذ الجدل بطبيعة الحال ما كانش بريء ولكن كان جزء من اديولوجيا الهيمنة اللي كان كل جنب ايدير جهود لتحقيقها اعلى احساب الاخر. أما إلى ارجعنا لهاذ القصة ف القرآن الكريم كما جات ف سورة الصافات (101)-(113):

"فَبَشِّرْنَاهُ بِغُلَامٍ حَلِيمٍ (101) فَلَمَّا بَلَغَ مَعَهُ السَّعْيَ قَالَ يَا بُنَيَّ إِنِّي أَرَىٰ فِي الْمَنَامِ أَنِّي أَذْبَحُكَ فَانْظُرْ مَاذَا تَرَىٰ، قَالَ يَا أَبَتِ افْعَلْ مَا تُؤْمَرُ، سَتَجِدُنِي إِن شَاءَ اللَّهُ مِنَ الصَّابِرِينَ (102) فَلَمَّا أَسْلَمَا وَتَلَّهُ لِلْجَبِينِ (103) وَنَادَيْنَاهُ أَنْ يَا إِبْرَاهِيمُ (104) قَدْ صَدَّقْتَ الرُّؤْيَا إِنَّا كَذَلِكَ نَجْزِي الْمُحْسِنِينَ (105) إِنَّ هَذَا لَهُوَ الْبَلَاءُ الْمُبِينُ (106) وَفَدَيْنَاهُ بِذَبْحٍ عَظِيمٍ (107) وَتَرَكْنَا عَلَيْهِ فِي الْآخِرِينَ (108) سَلَامٌ عَلَىٰ إِبْرَاهِيمَ (109) كَذَلِكَ نَجْزِي الْمُحْسِنِينَ (110) إِنَّهُ مِنْ عِبَادِنَا الْمُؤْمِنِينَ (111) وَبَشِّرْنَاهُ بِإِسْحَاقَ نَبِيًّا مِنَ الصَّالِحِينَ (112) وَبَارَكْنَا عَلَيْهِ وَعَلَىٰ إِسْحَاقَ وَمِنْ ذُرِّيَّتِهِمَا مُحْسِنٌ وَظَالِمٌ لِّنَفْسِهِ مُبِينٌ (113)"

فغادي نستنتجوا اللي منبعد:

**اللولى**، كنلقاوا بأنه كاين جوج اديال التبشير لسيدنا ابراهيم عليه السلام:

- التبشير اللول ابتاباويت اللي اوقع مرة وحدة كبرهان رباني كان فيه هو أو مرتوا ما يمكنش يولدوا نظرا لعامل السن أو هاذ التبشير متعلق بإسحاق كما جا ف الآيات من سورة الذريات:

(11) الصحابة أو منهم عمر بن الخطاب كانوا ايكولوا "اسحاق" هاذ الراي امشى فيه ابن جرير الطبري أما اللي گالوا "اسماعيل" فالمشهورين فيهم كنلقاوا ابن كثير أو الشنقيطي، شوف (<http://vb.tafsir.net/tafsir12898/#.VjKhUiuup8t>)

"هَلْ أَتَاكَ حَدِيثُ ضَيْفِ إِبْرَاهِيمَ الْمُكْرَمِينَ (24) إِذْ دَخَلُوا عَلَيْهِ فَقَالُوا سَلَامًا قَالَ سَلَامٌ قَوْمٌ مُنْكَرُونَ (25) فَرَاغَ إِلَى أَهْلِهِ فَجَاءَ بِعِجْلٍ سَمِينٍ (26) فَقَرَّبَهُ إِلَيْهِمْ قَالَ أَلَا تَأْكُلُونَ (27) فَأَوْجَسَ مِنْهُمْ خِيفَةً قَالُوا لَا تَخَفْ وَبَشَّرُوهُ بِغُلَامٍ عَلِيمٍ (28) فَأَقْبَلَتِ امْرَأَتُهُ فِي صَرَّةٍ فَصَكَّتْ وَجْهَهَا وَقَالَتْ عَجُوزٌ عَقِيمٌ (29) قَالُوا كَذَلِكَ قَالَ رَبُّكَ إِنَّهُ هُوَ الْحَكِيمُ الْعَلِيمُ (30)"

أما اللي قالوا بأن الله بشر سيدنا ابراهيم جوج مرات بتابويت مرة باسماعيل أو مرة بإسحاق فماعدتهم دليل من غير اعتمادهم على التغير في اللفظ اللي جا مرة "غلام حليم" أو مرة "غلام عليم" أو قالوا بأن الحليم هو اسماعيل أو العليم هو إسحاق، هاذ الاستنتاج كان الغرض منو كما اذكرت هو تحديد هوية الولد اللي كان غادي يتذبح، بينما يمكن نشوفو صفة الحليم ف العليم أو إوا العليم هو نفسو الحليم.

أما سيدنا اسماعيل فكان ابحالو ابحال اجميع البشر مولود بشكل طبيعي وخی اتذكر ف القرآن بأن سيدنا ابراهيم كان اكبير ف السن ملى زاد، اعلقاش الراجل كمّا هو معروف ما كتوقفش القدرة التناسلية اديالو امع السن، إنما المشكل كيكون عند لمرا ملى اتفوت سن اليأس أو لهاذ الشي كنشوفوا بأن رد الفعل اديال المرا اديال سيدنا ابراهيم هو اللي كان ايعبر اعلى الصدمة أو عدم التصديق

- التبشير الجاوج بالنبوة لإسحاق، أو هاذ التبشير ما كانش ف نفس الوقت اديال التبشير بتابويت ولكن كان وقت الذبح أو كان هاذ التبشير برهان جاوج لسيدنا ابراهيم جا امعاه ذبح اعظيم فداء للولد اللي كان غادي يتذبح. أما سيدنا اسماعيل فكان نبي أو رسول من الله ابلا ما ايكون لازم يتبشر بها سيدنا ابراهيم حسب ما جا ف القرآن الكريم ف سورة مريم:

"وَاذْكُرْ فِي الْكِتَابِ إِسْمَاعِيلَ إِنَّهُ كَانَ صَادِقَ الْوَعْدِ وَكَانَ رَسُولًا نَبِيًّا (54) وَكَانَ يَأْمُرُ أَهْلَهُ بِالصَّلَاةِ وَالزَّكَاةِ وَكَانَ عِنْدَ رَبِّهِ مَرْضِيًّا (55)"

الجاوجة، كيخبرنا القرآن الكريم ف نفس القصة بأن قضية الذبح هذي ما صدرتش بأمر إلهي مباشر ولا عبر رسل ملايكة كما ف التباشير اللي اذكرت، فسيدنا ابراهيم راه نبي الله كيتلقى الوحي، إنما احلم أو شاف ف المنام. اهنا تيار التحريف باش يتغلب اعلى هاذ المعضلة ارفع المنامة لدرجة الوحي أو گالوا "الرؤيا حق" أو خلطوا الظن باليقين أو كان لهاذ الخلط اثر اكبير كذلك اعلى نهضة المسلمين أو توطينهم للحضارة.

**الثالثة** هي أن سيدنا ابراهيم ما نفذش المنامة اديالو ( فهي أمر اديال الله حسب التفاسير اللي رايجة؟ )، ولكن ادخل ف نقاش امع ولدو الصغير كيطلب الراي اديالو فيها، ف الوقت اللي كان خاصو اينفذ بدون نقاش، ف هاذ النقاش كان رد الولد فيه جوج اديال المستويات. المستوى اللول هو التمييز أو النباهة، بحيث غال له "افعل ما تومر" أو ماگالوش "افعل ما امرك الله به"، اهنا فرق اكبير فاللولى مبينة للمجهول، يعني اللي اعطى الأمر مجهول، يمكن اكون ماشي الله سبحانه. المستوى الجاوج هو الانصياع التام لهاذ المصير من طرف هاذ الولد، اللي عبر من خلالو أنه كيستوعب أشياء ما يمكنش يستوعبها انسان كيف ماكان أو خاصة ف السن اديالو، اهنا اسكت القرآن الكريم أو مازادش التفاصيل.

**الرابعة** وهي تدخّل الإرادة الإلهية باش تمنع ما يوقعش الذبح اديال الولد أو اوقع التواصل الإلهي المباشر مع سيدنا ابراهيم أو اتوصف هاذ الحدث بـ"البلاء المبين"، اللي كييعني مصيبة اكبيرة اللي يمكن نعطيوها ابعاد اكثيرة، أو اتفدى الولد باذبيحة اعظيمة او ف هاذ الاتصال اتبشر سيدنا ابراهيم بنبوة ولدو اسحاق. فإلى زدنا جوج آيات لهاذ الشي اللي اذكرت واللي هما:



"وَأَمْرَاتُهُ قَائِمَةٌ فَضَحَكْتُ فَبَشَّرْنَاهَا بِإِسْحَاقَ" (71) سورة هود

"وَوَهَبْنَا لَهُ إِسْحَاقَ وَيَعْقُوبَ نَافِلَةً وَكُلًّا جَعَلْنَا صَالِحِينَ" (72) سورة الأنبياء

كنفهموا أنه كان تم تبشير إضافي على الهامش لمراتو "فبشرناها" أو مكانش متاصل امع التبشير بتاباويت لسيدنا إبراهيم، هاذ التبشير يمكن انكولوا اعليه يمكن ايكون ماشي ف علم إبراهيم اعليه السلام. أما ف الآية الجاوجة، ف القرآن الكريم كيذكر بأن الله اوهب اسحاق لإبراهيم "نافلة" يعني "زيادة"، الشي اللي كييعني بأن الله وهبو اسماعيل كمًا باقي البشر أو زاد ليه كبرهان إسحاق.

كنستنتجوا إوا من خلال كاع هاذ الشي اللي اذكرت أن المقصود بالذبح هو إسحاق "الغلام العليم" اعلقاش التصرف اديالو كان ناتج اعلى العلم اللي اعطاه الله، أو يمكن انظنوا بأنه كان من ضمن العلم اديالو بأنه غادي ايكون نبي أو يعلم بالشي اللي اتبشرت به الوالدة اديالو اعلى يعقوب، هاذ العلم كان غايب اعلى سيدنا إبراهيم، أو إوا أن الامتحان ماكانش ليه ولكن لسيدنا إبراهيم، لهاذ الشي وصفو الله بالعليم. ثم باش انزيدوا انرسخوا هاذ المسألة ايخص نفهموا اعلاش ابغى إبراهيم يذبح ولدو؟ فالقرآن ما كالأش اعلاش، وإنما ما عندنا غي التاويلات أو كل تاويل أو الخلفية اديالو. باش نوصلوا لهاذ الغاية ايخص نعرفوا بأن إبراهيم اعليه السلام استعمل الفكر اديالو باش اوصل لتوحيد الله كما جا ف القرآن الكريم "ولما رأى القمر بازغا قال هذا ربي...." أو كان إوا شديد الملاحظة، هاذ الشي اتكلم اعليه حتى ابن رشد ف فصل المقال (12):

"أعلم أن ممن خصه الله تعالى بهذا العلم وشرفه به، إبراهيم عليه السلام. فقال تعالى: "وكذلك نري إبراهيم ملكوت السموات والأرض"

الشي اللي كييعني أنه يقدر ايكون لاحظ أمور غير طبيعية ف ولدو اسحاق ولكن ما اقدرش يستوعبها، أو بما أن الوحي ما اعطاهش اجواب، خاف ايكون جبار ف المستقبل اديالو، ولا كذلك يمكن كان عندو علم بفساد السلالة اديالو، الشي اللي يقدر ايكون استحوذ اعلى الفكر اديالو أو اتجسد ليه الحل ف امنامة أو قرر اينفذها أو يذبحو. قصة كنتشبه لهاذي وقعت لسيدنا موسى امع العبد اللي اعطاه الله العلم ملي هاذ التالي اقتل دري أو ما اتقبلهاش سيدنا موسى أو ملي كانوا غادي يتفارقوا اشرح ليه السبب بأن هاذ الولد غادي ايكون طاغي ف المستقبل أو هنا به واليديه لعل الله يرزقهم غيرو ايكون صالح. ف هاذ السياق يمكن نفهموا التبشير اللي جا متباعد بأنه غادي ايكون نبي أو ولدو يعقوب نبي كذلك أو من السلالة اديالهم بجوج "وَمِنْ ذُرِّيَّتِهِمَا مُحْسِنٌ وَظَالِمٌ لِنَفْسِهِ مُبِينٌ". كاين اللي غادي ايكون فيه الخير أو كاين اللي غادي يظلم نفسو بشكل اكبير ابحال باقي الناس. فإلى اعتبرنا اليهود، كما هو رايح بين الأديان اديال التوحيد اليوم أو كما هو امرسخ ف العقيدة اديالهم، اتفرعوا اعلى سيدنا اسحاق كنلاحظوا أنهم ف التاريخ اديالهم دايمًا مابين جوج حالات يا إما التجبر أو الطغيان، يا إما الذل أو المهانة ف الطروفا اديالهم ف تافعلهم امع الأديان الاخرين. اليوم للأسف مازال الكهنوت اديالهم كيذفع ف استمرار هاذ الدورة، ف الوقت اللي مثلاً كنلقوا أوروبا، بفضل مستوى الحضارة اللي وصلت ليه الشعوب اديالها، ف إطار الشي اللي معروف ب "معاداة السامية"، كتحارب كل سلوك كيذكر بالإهانة اديال اليهود المعروفة بالهولوكست ف القرن 20 ف أوروبا، كنلقواهم

(12) "فصل المقال" اديال ابن رشد:

<http://al-hakawati.net/arabic/civilizations/244.pdf>

كيما رسوا هما طغيان ما عندو حد اعلى شعب مَسْلَم اللي كيفرح كل عام بالعيد الكبير أو يذبح الاكباش بمناسبة ذكرى الجد اديالهم إسحاق اللي انتقد من الموت أو اعطى استمرار العقيدة اديالهم أو الكهنوت اديالهم حتى اليوم.

أما الآية الثالثة من الجدول (5) فكتخص يوسف اعليه السلام أو اللي كذلك جا اعلى لسانو بأنه "حفيظ عليم". القصة اديالو ف القرآن الكريم معروفة، فهذا الوصف اللي خصّو به الله سبحانه "عليم" عندو نفس المضمون اللي اشرحت بالنسبة لإسحاق، حيث حتى هو من الصغر اديالو ميزو الله اعلى اخوتو بالعلم أو اقبل المؤامرة اديالهم، أو القرآن الكريم هاذ المرة بدون غموض اكشف بأن الله أوحى لسيدنا يوسف بأنه غادي ما يوقع فيه حتى سوء أو أنه غادي ايجي النهار اللي يخبرهم بهاذ الفعل اللي قاموا به:

**"فَلَمَّا ذَهَبُوا بِهِ وَأَجْمَعُوا أَنْ يَجْعَلُوهُ فِي غَيَابَتِ الْجُبِّ وَأَوْحَيْنَا إِلَيْهِ لَتُنَبِّئَنَّهُمْ بِأَمْرِهِمْ هَذَا وَهُمْ لَا يَشْعُرُونَ" سورة يوسف (15)**

فكان تحت الرعاية الربانية حتى وفقو الله، أو بهاذ العلم استطاع ينفذ مصر من الهلاك. أما الآيات 4، 5 أو 6 من الجدول (5) فهي جات اعلى ألسان فرعون أو القوم اديالو اللي كانوا يعتبروا السحرة عندهم قوة خارقة كيستمدوها من العلم، فهذا الجنب، القرآن خلى ليهم هاذ الوصف ماشي باش يؤكد هاذ الصفة فيهم، ولكن باش ينقل الاعتقاد السائد عندهم، أو هاذ الشي كتدل اعليه الاحداث اللي اتكلم اعليها القرآن الكريم ف شأنهم.

كذلك إلى شطنا كيفاش كتجمع هاذ اللفظات بجوج ف العربية اديال قريش، غادي نلقاها بأن "عليم" كتجمع "علماء" ف حين "عالم" كتجمع "عالمون" أو هاذ اللفظة جات ف الآية السابعة من الجدول ف إطار الكلام اعلى "الأمثال يضربها الله للناس". إوا باش نفهموا واش كيتمعن بها، ايخص نتساءلوا اعلاش كيضرب الله الأمثال للناس؟ الدراسة اديال هاذ القضية غادي بدون شك تفتح لنا أبواب فهم الإسلام ف الجوهر اديالو أو اللي كيلاءم العصر اديالنا أو كل عصر أو إياحاصر المرجعية اديال التحريفيين. كنعرفوا اليوم بأن الشرح اديال شي مسألة امعينة كيطلب يتعطى اعليها تصويرة، أو هاذ التصويرة هي المثل، أو هاذ المثل كيختار من بين أمثلة كثيرة، اهنا نتساءلوا كذلك واش هاذ التصويرة كتعكس بالضبط المسألة المطروحة؟ أو اعلاش كنختاروا هاذ التصويرة من بين اتساوور كثيرة لهاذ المسألة؟ ثم إلى اخترينا شي تصويرة ف شي وقت، واش غادي تبقى دايمًا صالحة أو ما تفقدش البريق اديالها مع الوقت؟ التصويرة هي مقارنة أو محاكاة فقط باش الإنسان يمكن لو اثبت الحقيقة أو ايخزنها ف الدماغ اديالو، اعلقاش هي الطريقة الوحيدة اللي عندو باش يدرك الأمور، هاذي مشيئة الله فيه، أو لهاذ السبب كيخاطبو بالأمثال. أما الحقيقة اللي يملكها سبحانه بالعلم فيستحيل يوصل ليها الإنسان، أو لهاذ الشي قال من بعد "وما يعقلها الا العالمون" أو ما قالش يستوعبها ولا يدركوها ولا شي حاجة مرتابطة بالدماغ ولكن بالعقل كما غادي نطرق لو منبعد، أو إوا ما يمكنش ايكونوا هاذ "العالمون" من بين البشر العاديين ولكن من بين العباد اديالو اللي يمكن يختارهم من بين الخلق اديالو كما اذكرت ف مسألة "العلماء".

## 5. العالم هو الله

خاضوا العرب اكثر ف الصفات اديال الله سبحانه أو اتفرقوا مذاهب أو افراقي كُلها يلغى بالغاه. كاين اللي خلاها ابلا عد أو كاين اللي اقتصر بالشي اللي مذكور بالحرف ف القرآن

الكريم، او كاين اللي اختصرها ف عدد اقليل، ابحال الأشاعرة اللي يعتبروا بأن الله عندو سبعة اديال الصفات أو الباقي ايخص يتأول. لكن لوكان انشوفوا مزيان ف هاذ الجدل، فالغاية منو هي محاولة من هاذ الفراقي يعطيوا تصويرة لله ف الذهن اديال المسلم من خلال اللسان تمكنو من اختبار المقارنات بالرغم من الإشكال اللي عبر اعليه القرآن الكريم ف الآية "وليس كمثله شيء" (سورة الشورى الآية 11)، بينما القوة أو الكبرورية أو غيرهم هي مرتبطة بحوايج ملموسين أو بمرجع أو معلم. للأسف هاذ الجدل ما أداش للنهوض بالقدرة اديال التخيل فينا اللي اتطور نمط التفكير اديالنا أو اللسان اديالنا أو إوا اترسخ الحضارة اديالنا أو اتحافظ اعلى الإيمان اديالنا. هاذ الشي امشى ف اتجاه التطاحن أو التكفير أو القتل كما وقع مثلا للحلاج اللي اتقتل بسبب أنه اوصف راسو ب تصريح غال فيه "أنا الحق"، بينما الحق صفة من صفات الله تعالى اعلى احساب الفهامة اديال اللي قتلوه.

ماشى الغرض اديالي اهنا انخوض ف هاذ الصفات كلها اللي غادي نرجع ليها منبعد، ولكن اللي كيهمني هو صفة "العالم". هاذ الصفة هي صفة أساسية من بين كل الصفات اللي يمكن نوصفوا بها الله سبحانه. فَفَ القرآن كنلقاوا العلم أو الرحمة أو المغفرة هما الصفات اللي جات بصيغة المتكلم "إني" أما الصفات الأخرين فكلها بالمخاطب ولا الغائب كما ف الآيات اللي منبعد:

الآية	السورة
1	وَلَقَدْ آتَيْنَا إِبْرَاهِيمَ رُشْدَهُ مِنْ قَبْلُ وَكُنَّا بِهِ عَالِمِينَ (51 الأنبياء)
2	وَكُنَّا بِكُلِّ شَيْءٍ عَالِمِينَ (81 الأنبياء)
3	قَالَ إِنِّي أَغْلَمُ مَا لَا تَعْلَمُونَ (30 البقرة)
4	قَالَ أَلَمْ أَقُلْ لَكُمْ إِنِّي أَغْلَمُ غَيْبَ السَّمَاوَاتِ وَالْأَرْضِ (33 البقرة)
5	نَبِّئْ عِبَادِي أَنِّي أَنَا الْغَفُورُ الرَّحِيمُ (49 الحجر)
6	أَلَمْ يَعْلَم بِأَنَّ اللَّهَ يَرَى (14 العلق)
7	رَبَّنَا تَقَبَّلْ مِنَّا إِنَّكَ أَنْتَ السَّمِيعُ الْعَلِيمُ (127 البقرة)

#### الجدول 6

الحكمة من هاذ الشي هو أن الله سبحانه بالرحمة اديالو خلى صفة العالم الصفة اللي اتدرك بالفطرة أو اللي اترسخ كذلك باكتساب المعرفة، لهاد الشي اتحدث بها بنفسو اعلى نفسو أو لهذا فهي أساسية، أما باقي الصفات فجات باش اترجم القدرات المعرفية أو الإدراكية أو اللسان اديالنا أو اتساير الفطرة أو لهادا جات بصيغة غير المتكلم اعلى راسو، أو إنما ابحال الانسان كيكلم الإنسان ولا الإنسان كايمخاطب الله سبحانه، اعلى هاذ الشي اوقع فيها الجدل أو الاقتتال. الجدل هو قاعدة الرقي بالإيمان أو الفكر، أو هادي هي إرادة الله في الإنسان حامل اللّمانة، أما الاقتتال فهو من شر تيار التحريف اللي كيههدف للاستبداد أو الركود اديال الفكر. الشي اللي كيبيين كذلك أساسية هاذ الصفة هو ما جاف القرآن الكريم ف سورة النمل:

"قَالَ عَفَرْتُ مِنْ الْجِنَّ أَنَا آتَيْكَ بِهِ قَبْلَ أَنْ تَقُومَ مِنْ مَقَامِكَ وَإِنِّي عَلَيْهِ لَقَوِيٍّ أَمِينٌ (39) قَالَ الَّذِي عِنْدَهُ عِلْمٌ مِنَ الْكِتَابِ أَنَا آتَيْكَ بِهِ قَبْلَ أَنْ يَرْتَدَّ إِلَيْكَ طَرْفُكَ (40)" ،

المقصود اهنا هو أنه لما اطلب سيدنا سليمان من المجلس اديالو اشكون يقدر اجيب لي ملكة بلقيس اتطرحت عليه مقترحات مبنية اعلى القوة "وإني عليه لقوي أمين" أو مقترح كيستند

اعلى "علم من الكتاب"، أو كان الفرق بين المقترحات بجوج ما اعليه اغبار، فمقترح القوة حدد اسقف زمني هو نهاية الاجتماع، أو حسب ما جا ف القرآن أن هاذ الاجتماعات كانت كتطول بدليل أنه ملي مات ما عاقوش بيه أو ابقاوا كيتسنوا حتى دودة خوست العصا اللي كان امتكي اعليها أو طاح، هاذ الطيحة اتكون باش وقعت اخذات اعلى الأقل واحد 12 ساعة، بصح ماشي عام كما ايروجوا الفقها اديال تحناط المخ، اعلقاش ف عام ماشي العصا اللي غادي اتقسم ولكن العظام اديالو، اعليه السلام، اللي غادي يتكرؤروا ف اللرض. بينما الاقتراح المبني اعلى العلم حايد الوقت أو ما ايحدو من انتاج اديال القوة أو تصريحها (حيث غال ليه اقبل ما ترمش)، أو هاذ الشي كيخلينا نستنتجوا بأن العلم اديال الله أو تصريح الإرادة اديالو ما يحتاجوش القوة ولا الوقت كما كنهموهم.

رغم هاذ الشي، التحريفيين كفروا افراقي أو صوفية بسبب الصفات، ولكن انتحلوا أعظم صفة لله سبحانه أو انتشرت ألقاب ابحال "عالم"، "علامة" من بين الزعماء اديالهم، واش ماشي هاذ هو الكفر الحقيقي؟ فكلمة الحق يمكن تحمل الكثير من المعاني أو التاويلات ما تستحقش أنه يتكفر شي واحد صرح بأنه الحق ابحال الحلاج، ولكن التصريح ابكون واحد "عالم" هاذي مسألة ما يمكنش تخضع للتاويل وإنما للتحريف.

هاذ المسار اللي اخذاه الإسلام أو هاذ التحريف اللي اعطانا الواقع المتخلف اللي كنعيشوه ايخلينا انشكوا ف أن انتشار هاذ المصطلح "الصفة" كان من بعد مدة من وفاة الرسول (ص) لغاية فرض الاستبداد، الشي اللي يعطي مصداقية لهاذ الشك هو كثرة الأحاديث اللي كتوجد "العلماء" أو اللي اغلبها كما شرت من اقبل ضعيفة ولا موضوعة حسب المحققين، أو اللي ايزيد ايكسر هاذ الفتناءة أو ايخليني نعتقد ان هاذ المصطلح ايكون اتشكل أو ابدى يتداول امع بداية حكم معاوية بن ابي سفيان هو الشي اللي ذكروا حجة الإسلام أبو حامد الغزالي ف كتابو "أحياء علوم الدين" (13) اعلى قرآن ابن عباس حيث اذكر بأنه كان كيقري ف سورة الحج الآية 52:

**" وما أرسنا قبلك من رسول ولا نبي "ولا محدث" إلا تمنى فالقى الشيطان في أمنيته"**  
فهاذ ابن عباس كيتعتر حبر الأمة أو ترجمان القرآن أو كان من المؤيدين اديال معاوية، أو هاذ الكلمة اديال "محدث" المقصود بها هما الناس اللي كانوا يحكيوا الأقوال أو السيرة اديال الرسول (ص)، يعني اللي غادي ايكونوا المرجع ف وضع السنة أو توفير النصوص اللي محتاجينها "العلماء" لتبرير الاستبداد. اليوم هاذ الكلمة ما كايناش ف القرآن، أو السؤال هو اعلاش ما ابقاتش؟ اكيد أنه كاين إجابات فيها التعويم اديال المشكلة أو عدم التعمق ف الخطورة اديال هاذ الزيادة. الحقيقة هي أنه كانت محاولة لتحريف القرآن الكريم باش تنضاف هاذ الفئة اديال المحدثين لجانب العلماء لمجال اديال المقدس، الشي اللي ايخلي الواحد يتساءل واش اللي اتجرء اعلى القرآن الكريم اللي هو من الله سبحانه غادي يخاف ينسب للرسول (ص) شي حاجة ما عمر غالها؟ فكذلك بالنسبة لـ "عالم" كنلقوا ف صحيح البخاري أن معاوية خلال زيارته للمدينة المنورة فعام الحج اديالو، أو اللي كان ف حوالي 50 سنة من بعد الهجرة، كيخاطبهم من فوق المنبر أو هو خليفة :

**" حدثنا عبد الله بن مسلمة عن مالك عن ابن شهاب عن حميد بن عبد الرحمن أنه سمع معاوية بن أبي سفيان عام حج على المنبر فتناول قصة من شعر وكانت في يدي حرسى فقال**

(13) "أحياء علوم الدين" مرجع اذكرتو من اقبل، شوف (1)

يا أهل المدينة أين علماؤكم؟ سمعت النبي صلى الله عليه وسلم ينهى عن مثل هذه ويقول إنما هلكت بنو إسرائيل حين اتخذوا نساؤهم" (14) أو كذلك كيحكي ابن رشد ف كتابو بداية المجتهد أو نهاية المقتصد (15) حديث لمعاوية أنه قال أو هو أعلى المنبر ف المدينة المنورة:

" يا أهل المدينة أين علماؤكم؟ سمعت رسول الله (ص) يقول : "اليوم هذا يوم عاشوراء ولم يكتب علينا صيامه و أنا صائم فمن شاء منكم فليصم و من شاء فليفطر" (موجود فصحیح البخاري (16)

المعروف أنه لما استقر مركز الحكم ف الشام كانوا المعارضين اديالو الأكثرية اديالهم ف مكة أو المدينة أو ف هاذ الخُطبات كيبدى ب "اين علماؤكم؟" تساؤل كيضرب به "جوج اطيور بحجرة وحدة"، من جيه كيئقلّي عليهم حيث القضية اللي كيئناولها ما عندهاش قيمة اكبيرة (اضفيرة اديال الشعر، ولاّ صوم عاشوراء) أو من جيه ابحال اللي كيقلب أعلى علما يخدموا امعاه كرجال دولة أو يعطيوه الشرعية.

لهذا ايخص يتعاود النظر ف هاذ الألقاب. إيخص إوا مصطلح كيئجنب هاذ الخلط أو يعكس القيمة أو الصفة اللي اتجي امع اصحاب العلم. كنعتقد هاذ الصفة يمكن انترجموها ف مصطلح ابحال "عُلماي" اللي الجمع اديالها ايكون "عُلماوة"، هاذ المصطلح الجديد ما يتعارضش امع المصطلح اديال "عالم" اللي مذكور ف القرآن كصفة اديال الله سبحانه. غادي نرجع لهاد الموضوع منبعد، أو نكتفي، كما كيگولوا المغاربة، ملي تكثر عليهم افهامات هاذ المحرفين، بتوكيد أن العالم هو الله.

## 1. - القرآن اكتاب اديال العلم المعروض

بطبيعة الحال مادام بين يدينا أو موجه لنا بلسان هو الوسيلة المهيمنة ف التواصل بيناتنا فأكد هو اكتاب الغاية الرئيسية اديالو ايوصل لنا جزء من العلم اللي ابغى الله سبحانه اكون عندنا، اللي هو كما اذكرت العلم المعروض. لهاد الشي كنلقاوا بزاف اديال الآيات ف القرآن الكريم كتبين، كما ف الجدول 7 اللي منبعد، هاذ الغاية:

(14):

[https://library.islamweb.net/newlibrary/display\\_book.php?idfrom=7241&idto=7250&bk\\_no=55&ID=1575](https://library.islamweb.net/newlibrary/display_book.php?idfrom=7241&idto=7250&bk_no=55&ID=1575)

(15): صفحة 294 "بداية المجتهد و نهاية المقتصد" ابن رشد، الجزء اللول، الطبعة السادسة 1982

(16)

[https://library.islamweb.net/newlibrary/display\\_book.php?bk\\_no=0&ID=1264&idfrom=1900&idto=1907&bookid=0&startno=3](https://library.islamweb.net/newlibrary/display_book.php?bk_no=0&ID=1264&idfrom=1900&idto=1907&bookid=0&startno=3)

ترتيب	الآية	السورة
1	فَالَّذِينَ يَسْتَحْيِبُوا لَكُمْ فَاعْلَمُوا أَنَّمَا أُنْزِلَ بِعِلْمِ اللَّهِ	(14 هود)
2	وَمَا عَلَّمْنَاهُ الشُّعْرَ وَمَا يَنْبَغِي لَهُ إِنْ هُوَ إِلَّا ذِكْرٌ وَقُرْآنٌ مُبِينٌ	(69 يس)
3	أَتُنُونِي بِكِتَابٍ مِنْ قَبْلِ هَذَا أَوْ أَثَارَةٍ مِنْ عِلْمٍ	(4 الأحقاف)
4	الَّذِي عَلَّمَ بِالْقَلَمِ، عَلَّمَ الْإِنْسَانَ مَا لَمْ يَعْلَمْ	(4، 5 العلق)
5	فَإِذَا أَمِنْتُمْ فَأَذْكُرُوا اللَّهَ كَمَا عَلَّمَكُم مَّا لَمْ تَكُونُوا تَعْلَمُونَ	(239 البقرة)
6	وَعُلَّمْتُمْ مَّا لَمْ تَعْلَمُوا أَنْتُمْ وَلَا آبَاؤُكُمْ	(91 الأنعام)
7	هُوَ الَّذِي أُنْزِلَ عَلَيْكَ الْكِتَابَ مِنْهُ آيَاتٌ مُحْكَمَاتٌ هُنَّ أُمُّ الْكِتَابِ وَأُخَرُ مُتَشَابِهَاتٌ	(آل عمران)
8	وَالَّذِينَ يُؤْمِنُونَ بِمَا أُنْزِلَ إِلَيْكَ وَمَا أُنْزِلَ مِنْ قَبْلِكَ وَبِالْآخِرَةِ هُمْ يُوقِنُونَ	(4 البقرة)

#### الجدول 7

ابلا شك أن القرآن فيه آيات أخرى أو كثيرة متعلقة بالنظام أو الحياة الاجتماعية اديال المسلمين أو هي التي كيتبنى عليها الشي التي كيتسمى "الشريعة الإسلامية"، أو منها كيستمد تيار التحريف قدسية الإديولوجيا اديالو أو إوا تأييد الفتنة عند المسلمين ليومنا هذا. هاذ الموضوع غادي نرجع ليه منبعد، فقط انشير اها كَمَا كيبان ف الآية السابعة من الجدول السابق، بأن القرآن مقسم لآيات محكمات التي هي "أم الكتاب" أو آيات متشابهات. اتكرس ف الاعتقادات اديالنا بسبب تيار التحريف، أن "المُحْكَمَات" هي التي الدلالة اللسانية اديالها واضحة أو ما اتنسختش، يعني ما جاتش شي آية كتعوضها، أو المتشابهة هي التي ما واضحاش أو تقبل التأويل، ف الحقيقة لوكان ناخذوا كنقطة بداية ازمان أو امكان انزول الوحي أو الوقت اتطور أو المحيط اتوسع ابلا ما يوقع أي تغيير ملموس ف الاحداث التي ميزت الزمان أو المكان اديال البداية، كان يمكن ا يكون هاذ التفسير اصحيح، أما إلى هاذ الشرط ما مومكينش، أو هاذ هو واقع الحال، فإن هاذ المقاربة خاطياً أو اخطيرة اعلى مسار الإسلام. فإلى كانت مقولة "الإسلام صالح لكل زمان أو مكان" قابلة للتصديق فإن الجزم بأن الوقت ازمان واحد أو المكان بيئة وحدة ما يقدرش يقبلها البال اديال ابندام، اعلقاش من البديهيات أن الوقت هو مانهاياش من الزمانات أو المكان كذلك هو مانهاياش من البيئات أو كل ازمان او بيئة كيتمزوا بالاحداث اديالهم. لهاذ الشي باش أنوفقوا ما بين هاذ البديهية أو خلود الإسلام ايخص انعادوا النظر ف المقاربة التحريفية او نعتبروا المحكم ف القرآن هو العلم المعروض بما يعني المطلق أو الباقي هو المتشابه بما يعني النسبي الي كيقبل التطور أو حتى التجاوز عند الضرورة، يا لحقوا التطور ف ازمان الوحي او اتلغى بنص آخر ولا ازمان الوحي ما كانش كافي لهاذ التطور ولكن يقدر ايولي ما صالحش منبعد ازمان ولا انتقلنا من بيئة لبيئة كانت كتنتمي لنفس الزمان ولا ازمان ف المستقبل. الاختلافات او المذاهب او الطوائف التي وقعت ف الإسلام من زمن الوحي حتى اليوم كانت كتخضع لهاذ القاعدة.

## 2. - محل العلم هو القلب

كل من يقرأ القرآن كيفهم بأن مكان العلم هو القلب أو فيه يستقر، لهذا الشيء قال الإمام الغزالي: "اعلم أن محل العلم هو القلب" (احياء علوم الدين المرجع 1)، أو الآيات التي ف الجدول (8) كتبين هاذ المسألة:

ت	آية	السورة	المقصود من الآية
1	قُلْ مَنْ كَانَ عَدُوًّا لِجِبْرِيلَ فَإِنَّهُ نَزَّلَهُ عَلَى قَلْبِكَ بِإِذْنِ اللَّهِ مُصَدِّقًا لِمَا بَيْنَ يَدَيْهِ وَمَنْ يُؤْمِن بِاللَّهِ يَهْدِ اللَّهُ قَلْبَهُ وَاللَّهُ بِكُلِّ شَيْءٍ عَلِيمٌ	البقرة: 97	العلم انزل اعلى قلب الرسول (ص)
2	هُوَ الَّذِي أَنْزَلَ السَّكِينَةَ فِي قُلُوبِ الْمُؤْمِنِينَ لِيَزْدَادُوا إِيمَانًا مَعَ إِيمَانِهِمْ وَجَعَلْنَا فِي قُلُوبِ الَّذِينَ اتَّبَعُوهُ رَأْفَةً وَرَحْمَةً	التغابن: 11	المومن، الله كيحط العلم ف القلب اديالو اللي كيهديه
3	وَلَكِنَّ اللَّهَ حَبَّبَ إِلَيْكُمُ الْإِيمَانَ وَزَيَّنَهُ فِي قُلُوبِكُمْ	الفتح: 4	المومن، الله كيحط العلم ف القلب اديالو اللي كيمنحو السكينة
4	أَلَمْ يَأْنِ لِلَّذِينَ آمَنُوا أَنْ تَخْشَعَ قُلُوبُهُمْ لِذِكْرِ اللَّهِ وَمَا نَزَلَ مِنَ الْحَقِّ	الحديد: 27	المومن، الله كيحط العلم ف القلب اديالو اللي كيمنحو الرأفة او الرحمة
5	أُولَئِكَ كَتَبَ فِي قُلُوبِهِمُ الْإِيمَانَ وَأَيَّدَهُمْ بِرُوحٍ مِنْهُ	الحجرات: 7	الإيمان كيتزين ف قلب المومن بالعلم
6	وَاذْكُرُوا نِعْمَتَ اللَّهِ عَلَيْكُمْ إِذْ كُنْتُمْ أَعْدَاءً فَأَلَّفَ بَيْنَ قُلُوبِكُمْ فَأَصْبَحْتُمْ بِنِعْمَتِهِ إِخْوَانًا	الحديد: 16	الخشوع هو رد فعل القلب ملي ايكون فيه العلم
7	قَالَتِ الْأَعْرَابُ آمَنَّا قُلْ لَمْ تُؤْمِنُوا وَلَكِنْ قُولُوا أَسْلَمْنَا وَلَمَّا يَدْخُلِ الْإِيمَانُ فِي قُلُوبِكُمْ وَإِنْ تُطِيعُوا اللَّهَ وَرَسُولَهُ لَا يَلِتْكُمْ مِنْ أَعْمَالِكُمْ شَيْئًا إِنَّ اللَّهَ غَفُورٌ رَحِيمٌ	المجادلة: 22	العلم هو الكتبة اديالو الله ف القلب اللي كتولي إيمان
8		آل عمران: 103	العلم واحد ف قلوب المومنين الشيء اللي يخلق التآلف
9		الحجرات: 14	شرط الايمان ايخص يدخل القلب

### الجدول 8

لهذا الشيء ف الإنسان المومن ما يحتاجش يبقى ايقلب ف السما و لا ف اللرض او الدماغ اديالو يستوعب معرفة اكبيرة باش يتحقق عندو الإيمان ولكن كل البشر قاري ولا ماقريش كيتساواوا ف هاذ المسألة شرط يدخل الإيمان القلب اديالهم كما جا ف الآية 9 من الجدول 8. لهذا الشيء كيبين القرآن الكريم أن الناس اللي ماشي مومنين القلوب اديالهم كتكون خاوية من العلم او أعطاهها ف هاذ الحالة اوصاف اكثيرة منها كنذكر مثلا ما ف الجدول 9 اللي مَنبُعد:

ت	الآية	السورة	الوصف
1	أَفَلَا يَتَذَكَّرُونَ الْقُرْآنَ أَمْ عَلَى قُلُوبٍ أَقْفَالُهَا	محمد: 24	اقلوب مقفولة
2	فَالَّذِينَ لَا يُؤْمِنُونَ بِالْآخِرَةِ قُلُوبُهُمْ مُنْكَرَةٌ وَهُمْ مُسْتَكْبِرُونَ	النحل: 22	اقلوب نكارة
3	كَذَلِكَ يَطْبَعُ اللَّهُ عَلَى قُلُوبِ الَّذِينَ لَا يَعْلَمُونَ	الروم: 59	اقلوب مطبوعة
5	فَإِنَّهَا لَا تَعْمَى الْأَبْصَارُ وَلَكِنْ تَعْمَى الْقُلُوبُ الَّتِي فِي الصُّدُورِ	الحج: 46	اقلوب معمية
6	وَإِذَا ذَكَرَ اللَّهُ وَحْدَهُ اشْمَأَزَّتْ قُلُوبُ الَّذِينَ لَا يُؤْمِنُونَ بِالْآخِرَةِ	الزمر: 45	اقلوب شمشاة
7	وَرَزَيْنَ ذَلِكَ فِي قُلُوبِكُمْ وَظَنَّتُمْ ظَنَّ السَّوْءِ وَكُنْتُمْ قَوْمًا بُورًا	الفتح: 12	اقلوب هايمة
8	ثُمَّ قَسَتْ قُلُوبُكُمْ مِنْ بَعْدِ ذَلِكَ	البقرة: 74	قلوب قاسية
9	إِنْ تَتُوبَا إِلَى اللَّهِ فَقَدْ صَغَتْ قُلُوبُكُمَا	التحریم: 4	: قلوب زايغة
10	وَقَالُوا قُلُوبُنَا غُلْفٌ	البقرة: 88	مغلقة، ما تفهمش الرسالة .
11	لَا يَزَالُ بُنْيَانُهُمُ الَّذِي بَنَوْا رِيبَةً فِي قُلُوبِهِمْ	التوبة: 110	قلوب مرتابة

#### الجدول 9

### 3. الغاية من العلم ف القلب هي العقل

كبيان من خلال هاذ الآيات اللي ف الجدول 10 اللي منبعد بأن للقلب مهمات :

ت	الآية	السورة	القلوب
1	أَفَلَمْ يَسِيرُوا فِي الْأَرْضِ فَتَكُونَ لَهُمْ قُلُوبٌ يَعْقِلُونَ بِهَا	الحج: 46	كتعقل
2	وما يعقلها إلا العالمون	العنكبوت 43	العلم سبب العقل
3	لَهُمْ قُلُوبٌ لَا يَفْقَهُونَ بِهَا	الأعراف 179	كتفقه
4	صَرَفَ اللَّهُ قُلُوبَهُمْ بِأَنَّهُمْ قَوْمٌ لَا يَفْقَهُونَ	التوبة: 127	كتفقه

#### الجدول 10

فمن بين هاذ المهمات كنلقاوا ف الأساس:

- **الفقه:** كيغني أنه من بعد ما يستقر العلم ف القلب، الإنسان كيتكتب الإيمان أو كيتزين ف القلب اديالو، أو لهذا ف اللسان المغربي كيتسمى "افقيه" كل شخص حافظ القرآن الكريم أو كيصلي بالناس أو كيعلّم القرآن للأخرين بمعنى أنه مفترض عندو قلب كيغني.

- **العقل:** ملي يصبح ما ف القلب ناتج اعلى تراكمات من التجارب اللي كترسخ الإيمان، او هاذ هو المعنى اديال الآيات 1 أو 2 من الجدول 10، هاذ الحالة كتتنعكس اعلى السلوك اديال الشخص أو المعاملات اديالو، أو كيصبح هاذ الإنسان عاقل، أو هاذ هو المفهوم القرآني للعقل أو حتى الأصل اديال الكلمة ف لسان العرب "عقل" كتعني "ربط". أما الاستعمالات اديال هاذ المصطلح اللي كنتدولوها اليوم فهي تحريف لهاد المفهوم أو تمطاط داز الحد المقبول اديالو،



الغرض من هاذ الأمر هو، كما ذكرت من قبل، الإجهاز اعلى أي محاولة للاجتهد أو التطور بتعويم المفاهيم. لذلك باش يتصحح هاذ الانحراف ايخص يتفهم بأن ماشي لكل انسان عقل عكس الشي اللي رايح من خلال المقولة " كرم الله الإنسان بالعقل " أو اللي كتعني بأن الله ميز الإنسان اعلى الحيوان بالعقل، الصحيح هو أن العقل كيشمل كل الدواب ومنها المومنين من البشر أو هاذ الشي كيبان ف الآيات اللي منبعد ف الجدول 11:

ت	الآية	السورة	المقصود
1	صُمِّ بِكُمْ عُمِّي فَهَمْ لَا يَعْقِلُونَ	(171 البقرة)	الإنسان
2	اتَّخَذُوا هُزُوءًا وَلَعِبًا ذَلِكَ بَانَتْهُمْ قَوْمٌ لَا يَعْقِلُونَ	(58 المائدة)	الإنسان
3	يَفْتَرُونَ عَلَى اللَّهِ الْكَذِبَ وَأَكْثَرُهُمْ لَا يَعْقِلُونَ	(103 المائدة)	الإنسان
4	إِنَّ شَرَّ الدَّوَابِّ عِنْدَ اللَّهِ الصُّمُّ الْبُكْمُ الَّذِينَ لَا يَعْقِلُونَ	(22 الأنفال)	الدواب
5	وَيَجْعَلُ الرَّجْسَ عَلَى الَّذِينَ لَا يَعْقِلُونَ	(100 يونس)	الإنسان

### الجدول 11

كيبان لبنا كذلك من خلال الآيات اللي ف الجدول اللي منبعد (الجدول 12)، أن الدواب كتسجد أو كتسبح لله تعالى، إوا كذلك فهي عاقلة ولكن ماخبرناش الله سبحانه كيفاش كيتم هاذ التسبيح اديالها أو هاذا علم مايمكنش نوصلوا اليه. كنستنتجوا كذلك بأن الدواب ما فيها شر، إنما الدواب الشريرة هي نوع من البشر من غير العاقلين كما كيبان واضح ف الآيات 1 أو 6 من الجدول 12 بخصوص هاذ المسألة:

ت	الآية	السورة
1	إِنَّ شَرَّ الدَّوَابِّ عِنْدَ اللَّهِ الَّذِينَ كَفَرُوا فَهُمْ لَا يُؤْمِنُونَ	(55 الأنفال)
2	أَلَمْ تَرَ أَنَّ اللَّهَ يَسْجُدُ لَهُ مَنْ فِي السَّمَاوَاتِ وَالْأَرْضِ وَالطَّيْرِ صَافَاتٍ كُلُّ قَدْ عَلِمَ صَلَاتَهُ وَتَسْبِيحَهُ وَاللَّهُ عَلِيمٌ بِمَا يَفْعَلُونَ	النور 24
3	أَلَمْ تَرَ أَنَّ اللَّهَ يَسْجُدُ لَهُ مَنْ فِي السَّمَاوَاتِ وَمَنْ فِي الْأَرْضِ وَالشَّمْسُ وَالْقَمَرُ وَالنُّجُومُ وَالْجِبَالُ وَالشَّجَرُ وَالدَّوَابُّ وَكَثِيرٌ مِنَ النَّاسِ	(17 الحج)
4	وَاللَّهُ يَسْجُدُ مَا فِي السَّمَاوَاتِ وَمَا فِي الْأَرْضِ مِنْ دَابَّةٍ وَالْمَلَائِكَةُ وَهُمْ لَا يَسْتَكْبِرُونَ	(49 النحل)
5	تُسَبِّحُ لَهُ السَّمَاوَاتُ السَّعْيُ وَالْأَرْضُ وَمَنْ فِيهِنَّ وَإِنْ مِنْ شَيْءٍ إِلَّا يُسَبِّحُ بِحَمْدِهِ وَلَكِنْ لَا تَفْقَهُونَ تَسْبِيحَهُمْ إِنَّهُ كَانَ حَلِيمًا غَفُورًا	الإسراء 44
6	وَلَوْ يُؤَاخِذُ اللَّهُ النَّاسَ بِظُلْمِهِمْ مَا تَرَكَ عَلَيْهَا مِنْ دَابَّةٍ	(61 النحل)

### الجدول 12

أما إلى غاب الفقه أو العقل اعلى القلب، فإن صاحب هاذ القلب ا يكون ضال أو اخرج اعلى الصراط المستقيم، القرآن الكريم ا هنا اوصف بعدة أوصاف الأفراد أو المجتمعات اللي ا تكون ف هاذ الحالة كما كنشوفوا اعلى سبيل المثال ف الآيات اللي ف الجدول 13 منبعد:

الآية	السورة	حالة الإنسان
وَأَشْرَبُوا فِي قُلُوبِهِمُ الْعِجْلَ بِكُفْرِهِمْ	البقرة: 93	الكفر
لِيَجْعَلَ اللَّهُ ذَلِكَ حَسْرَةً فِي قُلُوبِهِمْ	آل عمران: 156	الحسرة

يُرْضُونَكُمْ بِأَفْوَهِهِمْ وَتَأْبَى قُلُوبُهُمْ وَأَكْثَرُهُمْ فَاسِقُونَ	التوبة: 8.	الفسق
فَأَعْبَهُمْ نِفَاقًا فِي قُلُوبِهِمْ إِلَى يَوْمِ يَلْقَوْنَهُ	التوبة: 77	النفاق
لَا هِيَ قُلُوبُهُمْ	الأنبياء: 3	اللهو
إِذْ جَعَلَ الَّذِينَ كَفَرُوا فِي قُلُوبِهِمُ الْحَمِيَّةَ الْحَمِيَّةَ الْجَاهِلِيَّةَ	الفتح: 26	الجاهلية
كَذَلِكَ يَطْبَعُ اللَّهُ عَلَى كُلِّ قَلْبٍ مُتَكَبِّرٍ جَبَّارٍ	غافر: 35	التكبر
سَنُلْقِي فِي قُلُوبِ الَّذِينَ كَفَرُوا الرُّعْبَ بِمَا أَشْرَكُوا بِاللَّهِ	آل عمران: 151	الرعب
أُولَئِكَ الَّذِينَ لَمْ يُرِدِ اللَّهُ أَنْ يَظْهَرِ قُلُوبُهُمْ	المائدة: 41	النجاسة

### الجدول 13

#### 4. - الحساب عند الله اكون اعلى ما ف القلب:

الله سبحانه كذلك كيحاسب الإنسان اعلى امناش عامر قلوبو؛ إلى عاقل او كان فيه العلم أو الخير انجى أما إلى كان عامر بالشر نال سخط أو عذاب الله، اعلى هاذ الشي يستحيل يعرف شي حد المصير اديال الانسان عند الله ما دام مستحيل يتعرف اشنو كاين ف قلوبو اللهم الحكم النسبي اعلى ما يمكن اترجمو السلوكات اديالو ف المحيط اديالو من أفعال اديال الخير او الإصلاح. كل القرآن كيشير لهاد المسالة كما كيبان لينا ف الآيات اللي ف الجدول اللي منبعد:

الآية	السورة	صفات القلب او الجزاء
إِلَّا مَنْ أَتَى اللَّهَ بِقَلْبٍ سَلِيمٍ	الشعراء(89)	سالم سالك عند الله
مَنْ خَشِيَ الرَّحْمَنَ بِالْغَيْبِ وَجَاءَ بِقَلْبٍ مُنِيبٍ	ق: (33)	منيب سالك عند الله
يَخَافُونَ يَوْمًا تَتَقَلَّبُ فِيهِ الْقُلُوبُ وَالْأَبْصَارُ	النور: (37)	كيتقلب بالخوف يوم القيامة
قُلُوبٌ يَوْمَئِذٍ وَاجِفَةٌ	النازعات(8)	مرعوبة يوم القيامة
وَلَا تَكْتُمُوا الشَّهَادَةَ وَمَنْ يَكْتُمْهَا فَإِنَّهُ آثَمَ قَلْبُهُ	البقرة (283)	الشر كيحول القلب لآثم
وَلَكِنْ يُوَاحِدْكُمْ بِمَا كَسَبَتْ قُلُوبُكُمْ	البقرة (225)	العقاب اعلى ما ف القلب
وَلَكِنْ مَا تَعَمَّدَتْ قُلُوبُكُمْ	الأحزاب (5)	الحساب اعلى الشي اتعمدو

### الجدول 14

#### 5. القلب ف الصدر

دبا منبعد ما شفنا اشنو هو دور القلب ف علاقتو بالعلم، فشنو هو القلب؟ ف الحقيقة ما خلناش القرآن الكريم الحرية باش انقلبوا اعلى أشنو هو ف جسد الإنسان، بل حدد الموقع اديالو ف الصدر، ولكن الصدر ابراسو ما اموضّحش، أو السبب هو بدون الشك هو أن صدر الإنسان مكانش فيه لبس عند العرب أو حتى الصياغة اديالو دايمًا معرفة ب"ال" بخلاف القلب، هاذ التعريف كيدل اعلى أن الرسول كان ملي يتكلم اعلى الصدر كان كيشير ليه بيديه كما كنديروا حتى اليوم، أو هاذ الشي اللي كيبان ف الآيات اللي ف الجدول 15 منبعد:

ت	الآية	السورة	علاقة الصدر بالقلب
1	فَإِنَّهَا لَا تَعْمَى الْأَبْصَارُ وَلَكِنْ تَعْمَى الْقُلُوبُ الَّتِي فِي الصُّدُورِ	الحج (46)	القلب ف الصدر

2	فَمَنْ يُرِدِ اللَّهُ أَنْ يَهْدِيَهُ يَشْرَحْ صَدْرَهُ لِلْإِسْلَامِ	الأنعام(125)	الشرح ا هنا يعني التوسيع
3	وحصل ما في الصدور	العاديات (10)	تحصيل عمل القلب اللي ف الصدر
4	ويشف صدور قوم مؤمنين	التوبة (14)	المقصود شفاء القلب

### الجدول 15

#### 6. الفؤاد حاسة القلب:

جاف القرآن كذلك مصطلح الفؤاد كما ف الآيات اللي ف الجدول 16 من بعد:

1	مَا كَذَبَ الْفُؤَادُ مَا رَأَى	النجم(11).
2	وَكَلَّا نَقْصُ عَلَيْكَ مِنْ أَنْبَاءِ الرُّسُلِ مَا نُنَبِّتُ بِهِ فُؤَادَكَ	هود (120)
3	كَذَلِكَ لِنُنَبِّتَ بِهِ فُؤَادَكَ وَرَتَّلْنَاهُ تَرْتِيلًا	الفرقان (32)
4	وَأَصْبَحَ فُؤَادُ أُمِّ مُوسَىٰ فَارِغًا، إِنْ كَادَتْ لَتُبْدِي بِهِ لَوْلَا أَنْ رَبَطْنَا عَلَىٰ قَلْبِهَا لِتَكُونَ مِنَ الْمُؤْمِنِينَ	القصص (10)
5	فَاجْعَلْ أَفْنِدَةً مِنَ النَّاسِ تَهْوِي إِلَيْهِمْ وَارْزُقْهُمْ مِنَ الثَّمَرَاتِ	ابراهيم (37)
6	وَاللَّهُ أَخْرَجَكُمْ مِنْ بُطُونِ أُمَّهَاتِكُمْ لَا تَعْلَمُونَ شَيْئًا وَجَعَلَ لَكُمُ السَّمْعَ وَالْأَبْصَارَ وَالْأَفْئِدَةَ لَعَلَّكُمْ تَشْكُرُونَ	النحل (78).
7	وَلَا تَقْفُ مَا لَيْسَ لَكَ بِهِ عِلْمٌ إِنَّ السَّمْعَ وَالْبَصَرَ وَالْفُؤَادَ كُلُّ أُولَٰئِكَ كَانَ عَنْهُ مَسْئُولًا	الإسراء (36)
8	فَمَا أَغْنَىٰ عَنْهُمْ سَمْعُهُمْ وَلَا أَبْصَارُهُمْ وَلَا أَفْئِدَتُهُمْ مِنْ شَيْءٍ	الأحقاف (26)
9	مُهْطِعِينَ مُقْنِعِي رُءُوسِهِمْ لَا يَرْتَدُّ إِلَيْهِمْ طَرْفُهُمْ وَأَفْنِدْتُهُمْ هَوَاءَ	ابراهيم (43)
10	الَّتِي تَطَّلِعُ عَلَى الْفَئِدَةِ	الهمزة (7)
11	وَلِتَصْغَىٰ إِلَيْهِ أَفْنِدَةُ الَّذِينَ لَا يُؤْمِنُونَ بِالْآخِرَةِ	الأنعام (113)

### الجدول 16

كل المفسرين كيعتبروا الفؤاد هو القلب، ولكن ف لسان العرب (اديال بن منظور) كنلقاوا "والتَّفَوُّدُ التَّوَقُّدُ والفؤاد القلب لَتَقَوُّدِهِ وتوقُّده". أما إلى لاحظنا الآيات اللي اتذكر فيها هاذ المصطلح ابحال اللي ف الجدول 16، فكنتشفوا بأنه يمكن لينا نفهموا بأن الفؤاد ماشي مرادف للقلب يعني ماشي ابحال ابحال، أو هاذ الشي خاضوا فيه القدام أو المعاصرين من المفسرين (17)، وإنما هو للقلب كما الشوف للعين والسمع للوذن والشم للنيف، واللمس لليد، يعني يمكن نطلقوا عليه حاسة، أو هاذ الحاسة لما يوقع فيها خلل تصبح هواء أو فراغ كما عبرت اعليه الآيات 4 أو 9 ف الجدول 16. فمثلا الله سبحانه ف الآية اللي كتعلق بأم موسى ملي شاف بأن الفؤاد اديالها اصبح فراغ وجه القلب اديالها للإحساس الصحيح باش ما تغلطش ف رد الفعل اديالها أو باش اتكون من المومنين، كذلك ف الآية 6 من نفس الجدول 16 كتبين بأن الإنسان كيزيد من كرش امو أو الحواس اديالو مازال ف البداية اديالها أو منها الفؤاد ولكن كيزيد او كل الأعضاء اديالو كاملة. بطبيعة الحال هاذ المسألة إيمانية، لأن هاذ الحاسة ماشي بنفس طبيعة الحواس الخمس اللي كنعرفوا الجهاز العصبي اديالها كيفاش كيخدم أو إيوصل المعلومة للمخ. أو لربما اتكون عندها علاقة بالشي اللي معروف بالحاسة السادسة.

: <http://www.alukah.net/sharia/0/8717/#ixzz2oE0ZhEcU>(17)

### 3- الدرية:

إلى ارجعنا للقرآن الكريم أو لاحظنا الآيات اللي ف الجدول 17 اللي منبعده:

ت	الآية	السورة
1	وَمَا أَدْرَاكَ مَا الْحَاقَّةُ	(3 الحاقة)
2	وَمَا أَدْرَاكَ مَا سَقَرُ	(27 المدثر)
3	وَمَا أَدْرَاكَ مَا يَوْمُ الْفَصْلِ	(14 المرسلات)
4	وَمَا أَدْرَاكَ مَا يَوْمُ الدِّينِ، ثُمَّ مَا أَدْرَاكَ مَا يَوْمُ الدِّينِ	(17، 18 الإنفطار)
5	وَمَا أَدْرَاكَ مَا سَجِئُ	(8 المطففين)
6	وَمَا أَدْرَاكَ مَا عَلِيُّونَ	(19 المطففين)
7	وَمَا أَدْرَاكَ مَا الطَّارِقُ	(2 الطارق)
8	وَمَا أَدْرَاكَ مَا الْعَقَبَةُ	(12 البلد)
9	وَمَا أَدْرَاكَ مَا لَيْلَةُ الْقَدْرِ	(2 القدر)
10	وَمَا أَدْرَاكَ مَا الْقَارِعَةُ	(3 القارعة)
11	وَمَا أَدْرَاكَ مَا هِيَهُ	(10 القارعة)
12	وَمَا أَدْرَاكَ مَا الْخُطْمَةُ	(5 الهمزة)
13	وَإِنْ أَدْرِي أَقْرَبُ أَمْ بَعِيدُ مَا تُوعَدُونَ	(109 الأنبياء)
14	وَإِنْ أَدْرِي لَعَلَّهُ فِتْنَةٌ لَكُمْ وَمَتَاعٌ إِلَى حِينٍ	(111 الأنبياء)
15	قُلْ مَا كُنْتُ بِدْعًا مِنَ الرُّسُلِ وَمَا أَدْرِي مَا يُفْعَلُ بِي وَلَا بِكُمْ	(9 الأحقاف)
16	وَلَمْ أَدْرِ مَا حِسَابِيهِ	(26 الحاقة)
17	قُلْ إِنْ أَدْرِي أَقْرَبُ أَمْ تُوعَدُونَ أَمْ يَجْعَلُ لَهُ رَبِّي أَمَدًا	(25 الجن)
18	وَمَا تَدْرِي نَفْسٌ مَآذَا تَكْسِبُ غَدًا وَمَا تَدْرِي نَفْسٌ بِأَيِّ أَرْضٍ تَمُوتُ	(34 لقمان)
19	مَا كُنْتُ تَدْرِي مَا الْكِتَابُ وَلَا الْإِيمَانُ وَلَكِنْ جَعَلْنَاهُ نُورًا نَهْدِي بِهِ مَنْ نَشَاءُ مِنْ عِبَادِنَا	(52 الشورى)
20	لَا تَدْرِي لَعَلَّ اللَّهَ يُحْدِثُ بَعْدَ ذَلِكَ أَمْرًا	(1 الطلاق)
21	وَمَا يَدْرِيكَ لَعَلَّ السَّاعَةَ تَكُونُ قَرِيبًا	(63 الأحزاب)
22	وَإِذَا قِيلَ إِنَّ وَعْدَ اللَّهِ حَقٌّ وَالسَّاعَةُ لَا رَيْبَ فِيهَا قُلْتُمْ مَا نَدْرِي مَا السَّاعَةُ	(32 الجاثية)
23	وَأَنَا لَا نَدْرِي أَشَرٌّ أُرِيدُ بِمَنْ فِي الْأَرْضِ أَمْ أَرَادَ بِهِمْ رَبُّهُمْ رَشَدًا	(10 الجن)
24	وَمَا يَدْرِيكَ لَعَلَّهُ يَزَكِّي	(3 عبس)

الجدول 17

غادي انلاحضوا ف هاذ الآيات كلها أنه اتستعمل فعل " دَرَى " بدل "عِلْم" أو فعل "أدرى" بدل " أعلم" أو هاذ الشي ما جاش مرة ولا جوج باش الواحد يقدر ايگول راه استثناء، وإنما اتكرر بزاف اديال المرات أو ف نفس المعنى، الشي اللي ما يمكن ايخلينا نستنتجوا إلا أنه تم فرق اكبير ما بين الحالات بجوج. العلم هو عند الله تعالى بوحدو وأن الانسان ما يمكنلوش يوصل ليه بوحدو وإنما يحتاج لتواصل مباشر مع الله اعلى اطريق الرسل والانبيا باش يتأثلو أو يستقر ف قلوبو، ولهذا الله سبحانه ما خاطبش الإنسان اهنا ايسولو واش "يعلم" و إنما واش "يدري". ف اللسان العربي أو عند المفسرين ما كاينش فرق بين "درى" و "علم"، أو ما عمر شي حد انتابه لهاد الفرق اللي كيصدم حتى اليوم. فالى اخذينا آية من الآيات اللي ف هاذ الجدول 17، مثلاً:

"كَلَّا إِنَّ كِتَابَ الْفُجَارِ لَفِي سِجِّينٍ (7) وَمَا أَدْرَاكَ مَا سِجِّينٍ (8) كِتَابٌ مَرْقُومٌ (9)"  
(المطففين)

يمكن انلاحضوا أن الآية 7 كتخبرنا بأن "للفجار" كتاب "في سجين" أو هاذ علم من الله سبحانه، ثم الآية 8 كتسول الإنسان في صيغة تحدي واش يمكن لو يدري "ما سجين"، وبما أنه ما يقدرش، كتجي الآية 9 باش تعطيه إخبار علمي، هو من العلم المعروف، أو هاذ الخبر هو عبارة اعلى مقاربة مربوطة بصورة "كتاب مرقوم" يمكن براسها تخضع للتأويل حتى تولى شريط اديال الصور أو تشكل ظنية ولا ظنيات. هاذ الأمر كينطبق اعلى باقي الآيات اللي ف نفس الجدول 15.

## 1 مفهوم الدرية:

انطلاقاً من هاذ الشي اللي اذكرت كيظهر بأن فكر الإنسان او اللي كيطور مع الوقت ماشي هو "العلم" ولكن غادي نطلق اعليه مصطلح "الدَّرِيَّة" أو هي الترجمة اللي ايخص اتكون لمصطلح "science" باللاتينية. العلم لله أو الدرية للإنسان، أو لهاد العلم هبة من الله أما الدرية فكتكتاسب، أو هي كَمَا ابدات مَلِي اتوجد الإنسان فوق اللرض ما عمرها غادي توقف عند شي حد ولكن غادي تتواصل مادام الانسان موجود. أو كلما زاد الانسان للقدّام كلما تبين ليه أن دريتو ما زال ناقصة أو معمرها تتحول لعلم لأن العلم لله بوحدو. فحسب مستوى التطور اللي كتوصلو، كتتنقل الانسان من حالة استقرار لحالة استقرار اجديدة، أو كل حالة استقرار يمكن انسميها حقبة، أو كتتنسم بتمركز نشاط دريوي متقدم ف جهة ولا جهات معينة من العالم أو كتكون هاذ الجهة مركز الحضارة. فمثلاً إلى اخذنا الحقبة اللي كانت فيها الدريات كتقول بأن الارض هي مركز الكون غادي نلقوا اليونان أو من بعد العالم الاسلامي من بطوليمي حتى جا كوبرنيك أو ابدات حقبة جديدة. أو حتى نفهموا مزيان هاذ الفرق غادي نرجع لقصة ابراهيم عليه السلام ف سورة الأنعام:

"وَإِذْ قَالَ إِبْرَاهِيمُ لِأَبِيهِ آزَرَ اتَّخِذْ أَصْنَامًا آلِهَةً إِنِّي أَرَاكَ وَقَوْمَكَ فِي ضَلَالٍ مُّبِينٍ (74) وَكَذَلِكَ نُرِي إِبْرَاهِيمَ مَلَكُوتَ السَّمَاوَاتِ وَالْأَرْضِ وَلِيَكُونَ مِنَ الْمُوقِنِينَ (75) فَلَمَّا جَنَّ عَلَيْهِ اللَّيْلُ رَأَى كَوْكَبًا قَالَ هَذَا رَبِّي فَلَمَّا أَفَلَ قَالَ لَا أَحِبُّ الْآفَلِينَ (76) فَلَمَّا رَأَى الْقَمَرَ بَازِعًا قَالَ هَذَا رَبِّي فَلَمَّا أَفَلَ قَالَ لَيْسَ رَبِّي يَهْدِيَنِي رَبِّي لَأَكُونَنَّ مِنَ الْقَوْمِ الضَّالِّينَ (77) فَلَمَّا رَأَى الشَّمْسَ بَازِعَةً قَالَ هَذَا رَبِّي هَذَا أَكْبَرُ فَلَمَّا أَفَلَتْ قَالَ يَا قَوْمِ إِنِّي بَرِيءٌ مِمَّا تُشْرِكُونَ (78) إِنِّي وَجَّهْتُ وَجْهِيَ لِلَّذِي

فَطَرِ السَّمَاوَاتِ وَالْأَرْضَ حَنِيفًا وَمَا أَنَا مِنَ الْمُشْرِكِينَ (79) وَحَاجَّهُ قَوْمُهُ قَالَ أَتُحَاجُّونِي فِي اللَّهِ وَقَدْ هَدَانِ وَلَا أَخَافُ مَا تُشْرِكُونَ بِهِ إِلَّا أَن يَشَاءَ رَبِّي شَيْئًا وَسِعَ رَبِّي كُلَّ شَيْءٍ عِلْمًا أَفَلَا تَتَذَكَّرُونَ (80)"

كبيان بشكل ما يخفى اعلى عين، كما اذكرت، من اقبل بأن ابراهيم اعليه السلام حاول يوصل بالدريّة اديالو لحقيقة الله اعلى اطريق الملاحظة والمقارنة أو القياس أو ما اقدرش، أو اطلب ف الأخير من الله يهديه، فاستاجب لو الله سبحانه أو اعطاه العلم اللي ايوصلو لليقين. هاذ المفهوم اديال الدريّة حتى هو ما اسلكش من التأويل الغلاط أو التحريف، أو اتستعمل ف ترجمة مفهوم كيبر اعلى اتجاه فلسفي اظهر ف الغرب طلقوا اعليه مصطلح الأگنوستيسيزم (l'agnosticisme) أو اللي موخوذ من الكلمة اليونانية اگنوستوس ( agnostos) اللي كتعني "مادارکش". المعتنقين اديال هاذ المذهب كيقلوا بأنه مايمكنش نوصلوا لحقيقة وجود الله عن طريق الدريّة (science) بوحدھا، أو هاذ الشئ هو اللي كاتأكدوا الآية اديال سيدنا إبراهيم، أبلا ما ينفبوا ولا اياكدوا هاذ الوجود، أو هاذ الشئ ما كيتنافاش امع الإسلام اللي كياكد بأن هاذ الحقيقة كتأتى للإنسان عبر الرسل كما جا ف القرآن الكريم "وما كنا معذبين حتى نبعث رسولاً" ف سورة الاسراء الآية 15. فلوكان كان الإنسان قادر بالدريّة يوصل لھاذا الحقيقة ف شي وقت اشحال ما طال من الوجود اديالو، لوكان كان خلاه سبحانه حتى يوصل بلا ما ايضيفت الرسل ايوصلوا ليه العلم اللي يحتاجو لھاذا الحقيقة، الشئ اللي كيغني أن الإيمان بالله المصدر اديالو هو العلم ماشي الدريّة. تيار التحريف أوضع مقابل لھاذا مصطلح "الأدريّة" اللي جابھا دون شك من الآية اللي فيها "قلتم ما ندري..."، بينما المصطلح اللي يمكن أكون اقريب لھاذا الغاية هو "الما تدركيت" ولا "اللا إدراكية" وفق اللسان العربي اديال مُضَر. انطلاقا من هاذ التحديد، المتخصص ولا اللي كيشتاغل اعلى دريّة من الدريات غادي انسميه "دريايوي" مقابل (scientifique) ف اللسان لفرانسوي أو الجمع اديالھا "ديراوة". أو كذلك ما يتسمى "البحث العلمي" ايخص ايولي "البحث الدريوي" اللي بالفرانسوية ( recherche scientifique). هاذ الشئ غادي يدفعنا انراجعوا التسميات اللي متداولة اليوم ف هاذ المجال خاصة المؤسسات اللي كتُضَمَّن مصطلح العلم ابحال مثلا:

التسمية الحالية	التسمية اللي ايخص اتكون
وزارة التعليم العالي والبحث العلمي	" وزارة التعليم العالي والبحث الدريوي
كلية العلوم	كلية الدريات
كلية العلوم القانونية والاقتصادية والاجتماعية	كلية الدريات القانونية.....
كلية الآداب والعلوم الإنسانية	كلية الآداب والدريات الإنسانية
مركز البحث العلمي	مركز البحث الدريوي

### الجدول 18

أما الدريوي اللي عندو مساهمة اعظيمة ف المجال اديالو فغادي انسميه "عرفاوي" بجمع "عرفاوة" مقابل (un savant) ف اللسان لفرانسوي.

## 2 البال أمقابل العقل

كَمَا اتحرف مفهوم العلم، اتحرف كذلك مفهوم العقل، أو تعمم هاذ المصطلح بحيث اخلق بلبله أو احجب الحقيقة، أو ما ابقى حد يعرف الطريق اللي اتوصل لبر الأمان، أو فشلت كل محاولات الإصلاح أو النهضة أو التجديد كما اذكرت من اقبل، اعلقاش كل هاذ المحاولين، اللي ابغوا يصلحوا، طاحوا ف مندا ف المفاهيم اللي وضعو تيار التحريف. فهذا كيكتب "نقد العقل العربي"، أو هاذ "نقد العقل الإسلامي" أو هاذا كيتكلم اعلى "العقلية العربية" أو هاذا كيتكلم اعلى "العقلانية" أو هاذا اعلى علاقة "النقل بالعقل" أو هاذا يتكلم اعلى "استقالة العقل العربي" أو زيد أو زيد.... معتاقدين أنهم انطلاقا من النقل غادي يعطيو معنى واسع أو اجدد للعقل أو بيه غادي ابحاصروا النقل، حتى ظهرت تيارات أو فرق كلامية تاهت ف جدالات اعقيمة جلبت اعلى العرب ويلات التخلف أو الحروب الهمجية اللي مازال غاطسين فيها حتى الودنيين. فالى زادوا اعلى هاذ الطريق، امع السلاح اللي كاين ف السوق، غادي ياكلوا بعضهم بعض أو ايطيحو ف الشي اللي انقذهم منو الإسلام؛ أو اللي هو الهلاك، كما جا ف القرآن الكريم: **"وكنتم على شفا حفرة من النار فأنقذكم منها"** سورة آل عمران 103 .

العقل هو ما شرحناه ف باب العلم أو المحل اديالو هو القلب، أما الدرية فالمحل اديالها هو الدماغ اللي هو المحل اديال كل نشاط فكري أو معرفي، دور الدماغ اصبح حقيقة دريوية ما ابقى شك ف اكتشافها. اليوم درية العصبات امشات ابعيد ف هاذ الاتجاه، أو اصبح جيش من المختصين ف الدول المتقدمة ف اختصاصات كثيرة من البيولوجيا حتى الإعلاميات ودرية النفس منخارطين ف مشاريع بحث هائلة باش يفهموا الدماغ أو الدور الوظيفي اديالو عند الإنسان مستافدين ف هاذ المشاريع بالتطور التكنولوجي ف مجال الإشعاعات أو الرقمية (numérique)، أو ما مشروع "ربطوم الإنسان" (humain connectome project) أو اللي التمويل اديالو فات 40 مليون دولار بأمرىكا (18) إلا مثال اعلى هاذ المجهودات الجبارة.

الدماغ (ولا المخ) موجود ف الراس أو محمي باعظام الجمجمة، أو كما قلت ف ما اقبل هو مركز استقبال المعلومات أو تحليلها أو تركيبها أو بلورة رد الفعل الملائم أو إصدار الأوامر للتفاعل امع مصدر المعلومة. حتى حجة الإسلام أبو حامد الغزالي تحدث اعليه أو قال:

**"فيستقر هو - أعني المدرك من الإنسان- في القلب الذي هو وسط مملكته كالمملك و يجري القوة الخيالية المودعة في مقدم الدماغ مجرى صاحب بريده إذ تجتمع أخبار المحسوسات عنده، و يجري القوة الحافظة التي مسكنها مؤخر الدماغ مجرى خازنه،.... وكذلك سائرها (كيعني الحواس) فإنها أصحاب أخبار يلتقطونها من هذه العوالم و يؤدونها إلى القوة الخيالية التي هي كصاحب بريد، ويسلمها صاحب البريد إلى الخازن وهي الحافظة، ويعرضها الخازن على الملك (اللي هو القلب) فيقتبس الملك منها ما يحتاج إليه في تدبير مملكته وإتمام سفره الذي هو بصده، وقمع عدوه الذي هو مبتلى به"**

ولكن حطو حتى هو من جنود القلب، يعني ف الخدمة اديال هاذ التالي. فلوكان ف هاذ التحليل نقتصروا على العلم كما اشرحنه ف الباب الجاوج أو ما ندمجوش حتى الدرية فيه، أكون

[https://en.wikipedia.org/wiki/Human\\_Connectome\\_Project](https://en.wikipedia.org/wiki/Human_Connectome_Project) (18)

الغزالي حط بن يدينا كمسلمين ظنيات اعظيمة اعلى القلب، امع تصحيح يتماشى مع الحقبة اللي كنعيشوا فيها أو اللي هي أن القلب مشي هو الملك ولكن يمكن نعطيوه مهمة أمين سر الملك أو المستشار اديالو المكلف بمهمة العلم، أو اللي لابد منو وإلا ضاعت المملكة. أما الملك فهو الدماغ، أو هكذا يمكن لينا نفهموا أو أنوفقوا ما بين الإيمان اديالنا كمسلمين أو التطور الدريوي أو التكنولوجيا اللي كتعرفو الإنسانية. فالدماغ اليوم هو أعقد أجهزة جسم الإنسان، كما شرت اقبل، دريات ا كثيرة كتحاول تكتشف الأسرار اديالو. الكل ولّي يعرف أن أي خلل ف الدماغ كيأدي لضعف هاذ المملكة، أو إلى فات هاذ الخلل واحد الحد، تنهار هاذ المملكة، بينما يمكن اليوم ايبدل الإنسان القلب اديالو إلى امراض أو اعيش بقلب اصطناعي ولا بقلب انسان ماشي مسلم بدون ما يتأثر الإيمان اديالو، أو هاذ الشي، إلى ابغينا نتمهاوا امع الغزالي، يمكن انشبهوه بترجاع المستشار للملفات اللي بين يديه للملك لما ا يحس بالضعف ولا اقتراب الفراق حتى ايجي مستشار اجديد اللي يتسلم نفس الملفات اللي غادي اتكون محفوظة عند الملك. إوا المرحلة اللي كيحلل فيها الدماغ أو كيركب أو كيبلور التفاعل اديالو مع المحيط كنسميها بدل العقل "البال" أو هي المقابل ديال (esprit) ف الفرنسية، أو ف القرآن الكريم كنلقاوا ما يتفهم ف هاذ الاتجاه:

ت	الآية	السورة	مصطلح البال
1	قَالَ فَمَا بَالُ الْقُرُونِ الْأُولَىٰ (51) قَالَ عَلِمَهَا عِنْدَ رَبِّي فِي كِتَابٍ لَا يَضِلُّ رَبِّي وَلَا يَنْسَى (52)	طه	بال العصور الماضية
2	ارْجِعْ إِلَىٰ رَبِّكَ فَاسْأَلْهُ مَا بَالُ النَّسُوءِ اللَّاتِي قَطَعْنَ أَيْدِيَهُنَّ	يوسف (50)	بال النسا
3	كَفَرَ عَنْهُمْ سَيِّئَاتِهِمْ وَأَصْلَحَ بَالَهُمْ	محمد (2)	اصلاح البال
4	سَيَهْدِيهِمْ وَيُصْلِحُ بَالَهُمْ	محمد (5)	اصلاح البال

### الجدول 19

ف الآية (1) من هاذ الجدول 19، الكلام اعلى لسان فرعون لموسى اعليه السلام. الكل اليوم كييعرف بفضل درية الأركيولوجيا أو غيرها من الدريات أن الفراعنة كان عندهم تمكن اكبير ف ا كثير من الدريات أو التطبيقات اديالها أو اعليها ابناوا القوة أو العظمة اديالهم، أو لهاذا ف السؤال اديال هاذ فرعون لموسى اعليه السلام بخصوص المجتمعات اديال العصور اللي سبقاتهم ما يمكن إلا ا يكون ف المعنى اللي اعطيناه للبال؛ يعني الفكر أو المعرفة اديالهم. أما الآية الجاوجة فهي واضحة اكثر، فهي كتكلم اعلى سيدنا يوسف اعليه السلام اللي كيسول اعلى فكر أو قناعات النسا اللي قطّعوا يديهم ملّي شافوه.

أما الآيات 3 أو 4 من الجدول 19، الكلام فيها اعلى المومنين بالرسول محمد (ص) كيوعدهم الله سبحانه بالهداية اللي كتحقق بالعلم اللي كيستقر ف القلب، أو كذلك بإصلاح البال اديالهم اللي غادي ايطور الدماغ اديالهم. فكان ف هاذ الآيات، خاصة الرابعة، اقتران بين الهداية اللي ما يمكن اتكون إلا اعلى طريق الرسالة، يعني العلم، كما شفنا امع سيدنا إبراهيم لما قال من بعد ما حاول يوصل لحقيقة التوحيد أو ما اقدرش أو قال "إن لم يهديني ربي لأكونن من الضالين"، أو بين الإصلاح اللي ما يمكن ا يكون إلا اعلى طريق البال اللي خصو يطور أو



يبني قناعات امع الوقت تسمحلو افعل أي اصلاح. هاذ الاقتران الهدف اديالو هو بناء توازن عند المومن بين ما هو إيمان أو ما هو حضارة.  
أما إلى ارجعنا للسان المغربي فكذلك كنلقاواتعبيرات ابحال:

- راك ف البال

- ديرني ف بالك

- بالي امشوش

- رد البال

- مرتاح البال....

هاذ التعبيرات كتأكد أن المغاربة فاهمين هاذ المعنى اديال البال، لأنهم حافظوا اعلى المعنى الأصل اللي كانت كتحملوا العربية اقبل ما يتحكم ف الصيرورة اديال التطور اديالها تيار التحريف، أو اللي وخی هاكك ماقدرش إيأثر ف اللسان المغربي اللي ابقى ابقي اعلى مجالس اديال هاذ التيار أو اللي كانت داخل الصالونات كتعتبر هاذ القضية شأن اديال الخاصة، لكونها من جيه هي علم اللي ايمكن من الهيمنة أو المناصب ف الحكم، يعني أداة اديولوجية، أو من جيه العامة امخلطة يستحيل ايحولوها للمسار اللي ابغوا أو إنما إلى حاولوا يقدر يوقع العكس اديال الأهداف اللي باغيينها، أو هما اللي غادي يفقدوا سر القوة اللي عندهم أو ايزوبوا.

العقل إوا هو برنامج متكامل مفروض اعلى البال ما كيتحملوش الدماغ اعلى هاذ الشي اتوضع ف القلب، أولهاذ الشي كاين تعدد ف العقول: العقل المسلم، العقل المسيحي، العقل اليهودي، العقل الهندوسي أو العقل البوذي أو غيرهم من اعقول اكبيرة ف العالم. لكن كاين بال انساني مشترك هو أصل وحدة الحضارة الإنسانية، أو هاذ الاختلافات ف العقل هي اللي ف نظري كتغني التنوع "الثقافي" (\*) اعلى اللرض، هاذ التنوع هو واحد من أسس مبررات استمرار وجود أو تطور الإنسان ف هاذ الكوكب أو اللي يمكن ف حالة الاختفاء اديالو يقدر إيأدي للهلاك اديال الانسانية، هاذ الاستنتاج يمكن انشفوه إلى اتأملنا هاذ لعقول، فهي كلها كنلقاوها تتكلم بطريقة ولا اخرى اعلى هاذ المصير، أي أن كل عقل كيدعي أنه هو اللي غادي ايسيطر اعلى العالم ف آخر الزمن، الشي اللي كييعني أنه معمر ايسيطر اعلى عالم مازال الوقت فيه إيسيل ابلا نهاية، الشي اللي كينفي وجود الزمن التالي. كذلك ف الحديث اديال الرسول (ص) جا: **"اعمل لدنياك كأنك تعيش ابدا واعمل لآخرتك كأنك تموت غدا"** (19)، المقصود اديال هاذ الحديث ما شي هو اللي اتولفنا نسمعوه أو اللي كييعني التوفيق بين ملذات الحياة أو العبادة، ولكن هو أن المسلم ايخص اخدم البال اديالو او ايطور الدريات اديالو حتى يتمكن من أسباب القوة أو المناعة اللي تحميه أو تضمن لو يستمر ف الحياة أو ايعيش بكرامة، أو هذا هو مبتغى البال، اعلقاش كيههدف لتمكين الإنسان ف عالم الحياة. بالموازات ايخدم عقلو أو إيمانو ابحال اللي راه غادي ايموت غدا، أو هذا هو مبتغى العقل لأنه كيههدف لتمكين الإنسان ف عالم

(\*) احصرت كلمة "الثقافة" اعلقاش كنعتقد انها ترجمة خاطئة لكلمة "culture" الكلمة اللي

ايخص اتكون هي "الكياسة" او غادي نشرح اعلاش ف مناسبة اخرى

(19) هاذ الحديث كايضعفوه لعلامة اعلى حقاش النص اللول فيه ما يتلائمش امع الايديولوجية

اديالهم، شوف : (<https://islamqa.info/ar/130847>)

الآخرة. أما إلى خدَم الإنسان غي البال بوحده ولا غي لعقل بوحده فغادي يمشي للهلاك بدل البقاء اللي كييعتقدو، أو هاذ الشي اعلاش جا هاذ الحديث كيقرن بين استعمال البال أو العقل بجوجهم باش يضمن للإنسان المسلم الاستمرار اديالو للأبد ابلا خطر الهلاك اللي يمكن ايفاجئو أبلا ما يشعر به أو ما إيجي إيواجهو حتى إيكون فات فيه الحال، خاصة ف عقيدة الإسلام اللي كتنتفي انبعث الرسل من اجديد أو اعتبار محمد (ص) آخر الرسل. لهذا الشي المَسْلَم المومن هو اللي قلبو (عقلو) مطمأن أو ادماغو (بالو) مرتاح.

### 3 الصواب

باش انكمل الحديث اعلى البال، لابد من الكلام اعلى الخوايج اللي كيستعملها خلال مرحلة التحليل-التركيب-البلورة-القرار، هاذ الأدوات هي كل حاجة مخزونة ف الدماغ من معلومات كانت محسوسة من اتساور (images) ولا أمجردة من أفكار (idées) او اللي كتخزن ف قالب اللسان لأجل الاقتصاد ف حجم المَخَزَن، هاذ الغاية هي سبب حاجة الإنسان للتلسان (langage) ف نظري. أو هاذ الشي اللي كييتصطلح عليه بالعوامل الاجتماعية والثقافية والنفسية أو غيرها من محددات الشخصية. هاذ الأدوات إوا هي اللي اتوصل الإنسان باش ياخذ قرار ايميز فيه الصح من الغلط، هاذ الصيرورة غادي نطلق عليها مصطلح "الصواب" اللي كيقابل ف الفرنسية (la raison) أو هو مصدر فعل "صاوب" (raisonner) أو اللي يمكن نشقوا منها "المصاوبة" (raisonnable)، "التصاوب" ولا "تصوَبيت" (raisonnement) ولا "الصَوَابِيَّة" (rationnalisme) ولا "صوابني" (rationnel). فالمغاربة كيگولوا "العداوة ثابتة أو الصواب إيكون" أو هو الشي اللي كييفيد المعنى اللي تكلمنا عليه، أو ف القرآن الكريم كنلقوا آية وحدة اتستعمل فيها هاذ المصطلح: "يوم يقوم الروح والملائكة صفا لا يتكلمون إِلَّا مَنْ أَدْنَى لَهُ الرَّحْمَنُ وَقَالَ صَوَابًا، ذَلِكَ يَوْمَ الْحَقِّ، فَمَنْ شَاءَ اتَّخَذْ إِلَىٰ رَبِّهِ مَا بَأً" (38-39 النبا)، اللي كتبين بأن الله سبحانه يوم القيامة كيغطي قيمة اكبيرة لكل من كان اكلامو بالتصاوب من الخلق اديالو بدون ما يشترط ايكون ينتمي لهاذ الدين ولا هذا ولا ما عندو دين كاع، ف "واو" الجماعة ف كلمة "يتكلمون" كتشمل أي واحد من البشر، هاذ الشي كيبان من البداية اديال سورة النبا: "عم يتساءلون (1) عن النبا العظيم (2) الذي هم فيه مختلفون (3) كلا سوف يعلمون (4)". هاذ المعنى ماعمر انتابه ليه شي حد او غيباتو تيارات التحريف، الشي اللي كيخلينا نستنتجوا بما أن الله سبحانه كيغطي قيمة اكبيرة للصواب، فهو كذلك كيرفع من قيمته حتى ف الدنيا. اعلى هاذ الشي لابد من تحديد هاذ الصواب أو معرفة كيفاش كيغفرق لنا الصح بالغلط، أو اهنا اللي ايخص المفكرين أو الفلاسفة أو ديراوة يعطيوها الأجوبة الضرورية باش نتاجوزوا قرون الفشل اللي كنعيشوها حتى اليوم.

### 4- القيمة اديال الدرية ف الإسلام

إلى كان اسبقلي من خلال حديث للنبي (ص) (19) اتكلمت اعلى اهمية الدرية بالنسبة للمسلم فاهنا غادي انبين من خلال الآيات اللي منبهد اهمية الدرية ف القرآن من خلال تصحيح مفاهيم علمية اتعرضت للتحريف:

ت	الآية	السورة
1	قَالَتْ امْرَأَتُ الْعَزِيزِ الْأَنْ حَصَحَصَ الْحَقُّ أَنَا رَاوِدْتُهُ عَنْ نَفْسِهِ وَإِنَّهُ لَمِنَ الصَّادِقِينَ	(51 يوسف)
2	وَإِنْ تُعَدُّوا نِعْمَتَ اللَّهِ لَا تَحْصُوهَا	(34 ابراهيم)
3	وَإِنْ تُعَدُّوا نِعْمَةَ اللَّهِ لَا تَحْصُوهَا إِنَّ اللَّهَ لَغَفُورٌ رَحِيمٌ	(18 النحل)
4	فَطَلَّوْهُنَّ لِعَدَّتِهِنَّ وَأَحْصُوا الْعِدَّةَ	(1 الطلاق)
5	إِنَّ رَبَّكَ يَعْلَمُ أَنَّكَ تَقُومُ أَدْنَى مِنْ ثُلُثِي اللَّيْلِ وَنِصْفَهُ وَثُلُثَهُ وَطَائِفَةٌ مِنَ الَّذِينَ مَعَكَ وَاللَّهُ يُقَدِّرُ اللَّيْلَ وَالنَّهَارَ عَلِمَ أَنْ لَنْ تُحْصَوْهُ فَتَابَ عَلَيْكُمْ	(20 المزمل)
6	وَأَخَاطَ بِمَا لَدَيْهِمْ وَأَحْصَى كُلَّ شَيْءٍ عَدَدًا	(28 الجن)
7	ثُمَّ بَعَثْنَاهُمْ لِنَعْلَمَ أَيُّ الْحِزْبَيْنِ أَحْصَى لِمَا لَبِثُوا أَمَدًا	(12 الكهف)
8	لَا يُعَادِرُ صَغِيرَةً وَلَا كَبِيرَةً إِلَّا أَحْصَاهَا	(49 الكهف)
9	لَقَدْ أَحْصَاهُمْ وَعَدَّهُمْ عَدًّا	(94 مريم)
10	وَكُلَّ شَيْءٍ أَحْصَيْنَاهُ فِي إِمَامٍ مُبِينٍ	(12 يس)
11	أَحْصَاهُ اللَّهُ وَنُسُوهُ	(6 المجادلة)
12	وَكُلَّ شَيْءٍ أَحْصَيْنَاهُ كِتَابًا	(29 النبا)

### الجدول 20

ف هاذ الآيات اديال الجدول 20 كاملة كنلقاوا كلمة "أحصى" فشنو المعنى اديالها؟ من جهة، ف لسان العربي اديال مضر كنلقاوا ف معظم القواميس أنها تعني "عدّ" ولا كتأول حسب الظروف ابحال مثلا "حفظ" ولا "أطاق"...بينما كيبان واضح أن هاذ الكلمة مشتقة من "حصى" اللي كييعني ف نفس اللسان العربي احجر اصغير. من جهة أخرى، لوكان نرجعوا لتاريخ الرياضيات أو بالخصوص تاريخ الأعداد كنلقاوا بأن قبل ما يتمكن الإنسان المعاصر من تجريد الأعداد من أي صورة محسوسة كان كيستعمل "الحصى" باش ايعد ولا نكولوا باش "يحصى"، فمثلا كساب إلى كان عندو عدد اكبير من البهايم، من امعيز ولا اغنم ولا اجمال فيخص ايكون امعاه زوادة لكل نوع فيها عدد اديال الحصى قد عدد هاذ النوع من البهايم اللي عندو. باش انوضح هاذ المسألة اكثر، مثلا إلى كان عندو 57 معزة، 253 نعجة أو 219 جمل ايخص ايكون امعاه 3 ديال الزوادات مختلفة، وحدة فيها 57 حجرة، الثانية 253 أو الثالثة 219 حجرة، فكل ما ارجع من السريحة، ايخص يتأكد واش ما ضاعلوش شي راس من البهايم. الطريقة باش يتأكد هي يوقف عند باب الزريبة أو ايحل الزوادة أوكلما فاتت شي ابهيمه قدامو كيحايد حجرة من الزوادة حتى لآخر ابهيمه أو إلى ابقالو شي احجر ف الزوادة كيعرف باللي ضاع ليه من البهايم عدد الحجر اللي ابقالو ف الزوادة ، أو ايكون بهاذ العملية احصى لبهايم اديالو. كنستنتجوا كذلك من الأبيات الشعرية اديال العرب ف الجاهلية اللي منبعد أن امتلاك هاذ الزوادات اديال الحجر كييعكس الثروة أو المكانة اديال مولاها ف المجتمع كما جا ف لسان العرب لبن منظور:

"قال الأعشى يَفْضُلُ عامراً علي عُلْمة: وَلَسْتُ بِالْأَكْثَرِ مِنْهُمْ حَصِيّ....وإنما العِزَّةُ لِلْكَأْثَرِ وَأَنْشُد ابن بري : وقد عَلِمَ الْأَقْوَامُ أَنَّكَ سَيِّدٌ.... وَأَنَّكَ مِنْ دَارٍ شَدِيدٍ حَصَاتُهَا"

هاذ الشي اللي كيبان ف الآيات المذكورة ف الجدول 20 الفوق، فمثلا ف الآيات الجاوجة أو الثالثة من الجدول كنفهموا بأن الله سبحانه كيزيد ف العلم اديالنا بأن النعم اديالو ما يمكنش نحصيها اعلقاش ا كثيرة أو ما منتهاياش أو بالتالي مايمكنش نجمعوا الحجر اللي ايخصها. أما الآية الرابعة فكتبين دعوة القرآن الكريم لإحصاء عدة النسا أو هي مدة من الأيام معدودة

(dénombrable)، حيث الليل كيفرق النهارات، أو منتهية (finie). أما الآية الخامسة فكتكلم على الليل بما هو مدة زمنية محدودة ولكن ما اتعدش (indénombrable) اعلقاش الوقت كايبان متواصل (continu) حيث ماكاينش ظواهر اللي تقدر بسهولة اتقطعوا لأجزاء معدودة، الشي اللي كيغني أن ما بين وقت أو وقت كاين وقت، أو اعلى هاذ الشي الله كيشفهم هاذ الصعوبة الأساسية اللي كتواجه المومنين، أو إوا كيسامحهم أو كيتوب اعليهم اشحال ما قاموا للعبادة ف الليل كان شوية ولا بزاف اعلى احساب التقدير اديال كل واحد، اعلقاش هاذ الوقت ما يقبلش الإحصاء. أما الآيات اللي ابقات فكتناول اليقين العلمي اللي كيقول بأن كل شي محصي عند الله سبحانه، لهاذ الشي كاين من الفلاسفة أو ديراوة اللي ايقول بأن العالم هو أرقام أو كيتساءل واش الله سبحانه أوجد ف اللول الأعداد عاد العالم ولا العكس؟ سؤال كنعقاد الجواب اعليه من العلم المرفوع، التأويل أو الظن اللي يمكن نعتاقده هو أن الله اخلق العالم معدود ماشي متواصل ما يتعدش أو يبقى العلم عند الله سبحانه. أما لما كيتكلم الله اعلى راسو أو كيستعمل هاذ اللفظ ف هاذ الشي ما كيغنيش انه حتى هو كيستعمل الحجر ولكن باش أيوصل ليهم الفكرة باللسان اللي كيفهموه.

لهاذ الشي كلو كيبان واضح بأن كلمة "أحصى" كيقابلها ف الفرانسوية (calculer)، أو "الإحصاء" كيقابلها (calcul) اللي حتى هي الأصل اديالها ف اللاتينية عندو نفس المعنى اللي عندو ف العربية اللي هو "احجر اصغير". بناءا اعلى الشي اللي اذكرت، فالاختصاص ف الرياضيات اللي كيهتم بكل العمليات المرتبطة بالأعداد غادي نطلق عليه "درية الإحصاء" (science du calcul-arithmétique) بدل الشي اللي متداول عندنا باسم "علم الحساب" اللي هو ف الحقيقة تحريف لمصطلحات قرآنية اعظيمة، المصطلح اللول هو "العلم" واللي فكناه من قبل، أما الجاوج، "الحساب"، فهو مفهوم اتكلم اعليه القرآن ابلا تفصيل أو خلاه من شأن الله سبحانه أو تعالى، لكن يمكن اتصاغ اعليه ظنيات يمكن ايلوروها لينا علماوة ف اختصاص يمكن انسميوه "علم الحساب"، ف إطار علوم اللاهوت، نفهموا من خلالو احساب الله أو كيفاش ايكون يوم الحساب ف الآخرة.

إلا أن فعل "حسب" واللي كيغني "حسب الشي: عده" كيمّا ف القواميس اديال العربية، فيمكن اتستعمل للتعبير اعلى العمليات الرياضياوية اديال زائد ولا ناقص واحد، الشي اللي كيغني العدّ (dénombrement) أو يمكن تتوسع باش تعني كذلك العمليات الشفوية للأعداد اللي ماشي مثالية ولكن بسيطة ابحال الحسبة بالجوج (2, 4, 6, 8, ...) ولا بالخمس (5, 10, 15, 20, ....) باش اتبان المعرفة بالأعداد خاصة عند الدراري ف المدرسة، هاذ المعنى كيقابلو ف الفرانسوية (compter) أو منو نستخرجوا مصطلح (الحسابة) جمع (الحسابات) ولا "الحسبة" باللسان المغربي اللي كيقابلو ف الفرانسوية (compte) أما "الحساب" فهو شي اعظيم ما يعلم به إلا الله سبحانه، والفرق بيناتهم ابحال الفرق ما بين ايگول الواحد "كُتِبَ كِتَابَةٌ" ولا بالمغربية "اكتب كُتِبَ" أو "كتب كِتَابًا" ولا بالمغربية "اكتب كُتِبَ"، الفرق ما بين "كُتِبَ" أو "اكتب" باين أو اعظيم. إوا باش ترجع الأمور لطريق الحق، ايخص اتغير العديد من التسميات ابحال:

المستعمل اليوم	المقابل ف الفرانسوية	اللي ايخص ايكون
الحساب البنكي	Compte bancaire	الحسبة البانكاوية

المجلس الأعلى للحسابات	La cour des comptes	المجلس الأعلى ديال لحسوب
المحاسب	Le comptable	الحسابوي
المحاسبة	La comptabilité	المحاسبة
العداد	Le compteur	المحساب

## الجدول 21

أما العداد، فـالمقابل ديالو ف الفرنسية هو (dénombrateur) أو هو الشي اللي ايمكنا انفوتوا من حاجة ما اتعدش لحوايج معدودة ابحال الانتقال من القيل "اعطني الما" للقيل "اعطيني جوج كيسان ديال الما"، فالكاس هو العداد أما اللي يحسب الكيسان فهو المحساب.

أما الشي اللي كيتطلق عليه "علم الإحصاء" ولا "الإحصائيات" فهو كذلك ماشي ف محلو كترجمة ل (les statistiques) بالفرنساوية. هاذ المجال هو فرع من الرياضيات كيهتم بدراسة لمعاشر (جمع معشر) كما جا ف القرآن "يا معشر الجن والإنس..." ولا ف الحديث "يا معشر الشباب..." واللي المقابل اديالو ف الفرنسية (population) واللي إوا هي مجموعة اعظيمة من أفراد ولا عناصر كتقاسم اخصايص كتسمح لها باش تبقى متجمعة ولا متعاشرة بصيغة ادقيقة. نظرا لطبيعة موضوع هاذ الدرية، واللي ما ايمكناش من دراسة كل عنصر بوحده ثم الاستنتاج اعلى المجموع بسبب العدد الكبير لهاذ العناصر أو للتفاعلات المعقدة اللي كتربط بيناتها، فإنها كترتكز اعلى الاحتمال أو التقريب أو المعدلات. الشي اللي كيخليها مجال دريوي عندو أهمية اكبيرة هو الجنب التطبيقي فيها، خاصة ف الاقتصاد، السياسة أو درية الاجتماع أو شلاً دريات اخرين ابحال البيولوجيا أو الفيزياء أو المناخ أو البيئة أو غيرهم، هاذ الشي اعلقاش كتعتبر أداة مهمة لرصد التطورات او التحولات اللي يمكن يعرفها المعشر المعني ف المستقبل أو إوا التدخل ف الوقت المناسب لتفادي التطورات اللي ما مرغوبش فيها، من هنا كل واحد يمكن ليه يتصور هاذ الأهمية ف سياسة الدول. أما الى ارجعنا لتاريخ هاذ المصطلح، فهو اظهر أول مرة ف المانيا خلال القرن اثنى عشر ميلادي أو الأصل اديالو اكون كلمة (status) اللاتينية أو اللي كتعني "الدولة" أو منها اشتق (statistica) اللي كتعني "متعلق بالدولة" ف الإيطالية، أو من هنا اتعمم لجميع اللسون الأوروبية ف الإنجليزية (Statistics)، ف الألمانية (statistik) أو ف الفرنسية كما اذكرنا (statistique). اليوم، بفضل التطور الرقماوي او المعلوماتي، اتطورت هاذ الدرية بشكل اكبير أو خلقت تحول جذري ف دريات اكلتيرة خاصة الدريات الاجتماعية أو الاقتصادية، لهاذا ف نظري الترجمة اللي ايخص اتكون ف اللسان المغربي لهاذ المصطلح هي يا إما تبقى كما هي او نستعملوا حتى احنا مصطلح "الستاتستيك" ولا "الدولوات" باش انحافظوا اعلى أصل المعنى او انكونوا أكثر أمانة، أو إوا انسميوا هاذ المجال "درية الدولوات"، أو انغيروا التسميات اللي كتستعمل هاذ المصطلح:

المستعمل اليوم	اللي ايخص يتستعمل
المعهد الوطني للإحصاء والاقتصاد التطبيقي	المعهد الوطني للدولوات أو الاقتصاد التطبيقي
مديرية الإحصاء	مديرية الدولوات

## الجدول 22

أما "علم الإحصاء" فيمكن كذلك إيكون من اختصاص علماء، اصيغوا من خلالو ظنيات حول عظمة الله سبحانه ف العد أو الإحصاء، اعلقاش ما كاينش ف القرآن كيفاش نقدرنا نتصوروا

هاذ العظمة، أو ف كل الأحوال ما يمكنش اتكون بالطريقة اللي اتخص "درية الإحصاء" ولا اللي اتخص "درية الدولوات" لأنهم بجوج كيعبروا ف آخر المطاف اعلى نقص أو ضعف عند الإنسان ف الإحاطة المطلقة بالأمر الأساسية اللي يمكن ليها اتوصلو للحقيقة التامة او المطلقة، أو وإا الاكتفاء بالشئ اللي يقضي الغرض أو ايقق المصلحة.

هاذ الآيات القرآنية كلها كترفع إما مباشرة ولا غير مباشرة من قيمة تَعْلَام الإحصاء أو الاتقان اديالو، أو من تم يمكن لينا انعمّموا دعوة الإسلام للتمكن من كل الدريات أو الاجتهاد أو الابتكار فيها بدون شرط مسبق ولا تضيق، اعلقاش كلها مبنية اعلى الإحصاء.

الشئ اللي ايزيد إياك هاذ القيمة اللي خصصها الإسلام للحقيقة الدريوية ما جا كذلك ف الآية اللولى من الجدول 20، فكلمة "حصّص" هي مشتقة كذلك من "الحصى" أو ف المعاجم اديال العربية كنلقاوها كتعني "ظهر بعد خفاء"، ولكن هاذ الشئ فقط معنى صوري لتفسير المقصود من الآية القرآنية، أما المعنى الخاص فكيبان ف كلمة "الحصصة" حسب مثلاً معجم "الصاح في اللغة" كتعني "تحريك الشئ في الشئ" الشئ اللي اخلينا نستنتجوا بأن المعنى القريب للواقع هو "تحريك الحصى ف الزوادة" الشئ اللي كيغطي صوت كينبّه البال بأن الحقيقة موجودة داخل الزوادة، خاصة إلى كان ثم جدل بين جوج اطروفا اعلى قضية فيها خلاف بيناتهم، أو هاذ الشئ هو المغزى من هاذ التعبير اللي جا ف الآية، اعلقاش اعتراف لمرا اديال العزيز بأنها هي اللي اتعدات اعلى يوسف اعليه السلام، هو ابحال الحصصة ف الظهور اديالو بعدما التبس اعليهم الأمر لمدة اطويلة عانى فيها يوسف اعليه السلام. من هاذ القصة كنستنتجوا وإا بأن الإسلام كيغطي أهمية اكبيرة للحقيقة الدريوية أو كيعتبرها حاسمة لدحض الباطل. هاذ الشئ كذلك كيدفعنا ف الأخير، باش انعاودوا النظر ف مصطلح "الحاسوب" (ordinateur) أو نستعملوا ف ف مكانو مصطلح "الحصّوص" اللي كيغني "الذي يتتبّع دقائق الأمور فيعلمها ويحصيها" حسب المعجم الوسيط. أو نستعملوا كذلك مصطلح "الحصّاية" بدل "الآلة الحاسبة" (calculatrice).

فالإي كان الله سبحانه، كما وضحنا ف باب العلم، اعرض أمانة العلم اعلى الإنسان أو اقبلها لحماية نفسو من الظلم والجهل اللي كيأديوا به للهلاك، فإنه سبحانه أو تعالى كرم الإنسان أو فضلوا اعلى الكثير من خلقو بالدريّة أو البال، أو هاذا هو معنى الآية الكريمة:

**"وَلَقَدْ كَرَّمْنَا بَنِي آدَمَ وَحَمَلْنَاهُمْ فِي الْبَرِّ وَالْبَحْرِ وَرَزَقْنَاهُمْ مِنَ الطَّيِّبَاتِ وَفَضَّلْنَاهُمْ عَلَى كَثِيرٍ مِمَّنْ خَلَقْنَا تَفْضِيلًا" (70 الإسراء)**

فالباخر أو البّابر ما القاهومش الإنسان فوق الما أو استعملهم أو إنما أوصل يصنعهم كتطبيقات لكثير من الدريات، أو كذلك تدجين الدواب فات بمراحل اطويلة من التفاعل أو الاحتكاك بين الإنسان أو البيئّة كان فيها الإنسان إيراكم الخبرات بفضل البال اللي كرمو الله به سمحت ليه باش يوصل ايدير انتقاء للدواب اللي تصلح لو.

فالإي كنت من اقبل، ف باب العلم، بينت بأن القرآن هو كتاب علم أو بينت ف هاذ الباب أنه كيشرح اعلى الدريّة، فإنه ماشي اكتاب اديال شئ درية من الدريات أو ما عمر استعمل شئ درية ما ف بالّش الناس باش يقنعهم بالإيمان، كما وضحت من اقبل بالنسبة لسيدنا إبراهيم عليه السلام، عكس الشئ اللي كيدعيوه المحرّفين المعاصرين ف "الاعجاز العلمي". فلوكان الله سبحانه أيقوم بهاذ الشئ امع الرسل اديالو غادي أكون تاريخ البشرية أو الحضارات اللي ابناها الانسان هو غير التاريخ اللي كنعرفوه ف اجميع المجالات اديال الحضارة، أو لربما أكون عند الانسان درية يمكن نعتبروها علم من العلم اللي سميتو العلم المرفوع، اعلقاش

غادي يكون عندها طابع مطلق، ما اتكونش تقريبية او ماتوليش فيها تناقضات من بعد ما ايطول الزمان، او اتكشفت للإنسان كما هي عند الله سبحانه او ايولي الانسان عندو نفس العلم اللي عند الله، بمعنى ما غاديش يكون كاين فرق ما بين الدرية او العلم او ما يبقاش كاين شي علم مرفوع. ف هاذ الحالة آش غادي اتكون المهمة اديال البال اللي اكرمنا به الله سبحانه؟ غادي طبعا ما تبقى عندو حتى شي مهمة ايقوم بها إلا يطمع ف ملك الله او اينصب راسو إلاه اديال الله، او هاذ الشي ما يدخل غي ف راس شي مهبول من هاذوك اللي كيقتادوا بأن الله سبحانه كيكشف ليهم اعلى اسرار الملك اديالو، فالله تعالى احسم هاذ المسألة لما جا ف الآية الكريمة " **وعنده مفاتيح الغيب لا يعلمها إلا هو**" ف سورة الأنعام (59)، او كذلك ف سورة البقرة الآية 255: **"ولا يحيطون بشيء من علمه إلا بما شاء"**. كذلك من المستحيل أنه ايوري شي حاجة للإنسان ف إطار الدرية اعلقاش كذلك اهنا هاذ المبادرة، كما اذكرت بالإضافة للشي اللي يمكن ينتج اعليها، غادي اتكون خارجة اعلى الفطرة او الشي اللي يتحملو البال او الدماغ اديال الانسان اللي عاصر الوحي، هاذ الشي كذلك شار ليه القرآن الكريم ف سورة الأنعام الآية 50: **"قل لا أقول لكم عندي خزائن الله ولا أعلم الغيب ولا أقول لكم إني ملك"**، ف "الخزائن" اهنا المعنى اديالها هو الدرية اللي كتمنح الإنسان القدرة اعلى التمكن ف اللرض أو بناء الحضارة، او الشي اللي ايزيد اياك هاذ المعنى هو ما جا ف الآية 37 من سورة الطور **"أم عندهم خزائن ربك أم هم المسيطرون"**، فهاذ التساؤل اللي كيربط ما بين الخزائن او السيطرة ما يمكن يعطي غي المعنى اديال المعرفة او الدرية لهاذ المصطلح. فالله سبحانه اوهب الانسان البال او من خللو خلاه يتطور او اتطور المعرفة اديالو ما دام موجود ف اللرض، أو هاذ الشي كياخذ وقت اطويل او تجربة كيراكمها مع العصور، او هاذ هو معنى الآية الكريمة 21 من سورة الحجر: **"وإن من شيء إلا عندنا خزائنه وما ننزله إلا بقدر معلوم"**.

## 5- خاتمة

بيّنت بأن الشي اللي اجرات العادة عند العرب ايسميوه "العلم" ايخص يتقسم لعلم أو درية، أو وضحت الأهمية اديالهم بجوج ف الإسلام، أو ف نظري الخلط بيناتهم اللي واقع حتى اليوم هو السبب الرئيسي ف الانحطاط اللي كنعيشوه من ازمان طويل بزاف، أو ف الفشل اديال كل الإصلاحات المعاصرة ف الدول العربية. كل الحضارات كتبنى بالدرية او المعرفة، أما العلم، فالدور اديالو أبحال عساس الحدود اديالها. هاذ الصورة يمكن لينا انشبهوها ابحال شي آلة ف حركة دائمة، إلى وقفت تدمر أو إلى زادت السرعة اديالها اعلى واحد الحد تتدمر كذلك. كيتحكم ف الحركة اديال هاذ الآلة اكسيراتور (un accélérateur) أو أفران (un frein). اشحال ما كان التناغم والتكامل ما بين هاذ الجوج اديال الأجزاء منها، اشحال ما كانت الحركة منتظمة أو الآلة ف أمان. الدرية هي الكسيراتور او العلم هو الأفران اديالها. فإلى حايدنا الأفران، فسرعة الحركة اديال الآلة ما غاديش اتضبط أو غادي اتجاوز الحدود اللي اتحملها، أو يمكن بالتالي تنزلق للدمار، أو نفس الشي إلى حايدنا الكسيراتور، الحركة غادي توقف أو يوقع الدمار اديالها كذلك.